

128

HARVARD COLLEGE LIBRARY  
FROM THE  
HARVARD-YENCHING  
INSTITUTE

OCT 7 1928

~~Ch L 9297.74~~

~~Ch L 9801.74~~

Ch L<sup>R</sup> 9297 / 1184



冊府元龜



淮南李嗣京叅閱

西極文翔鳳訂正

豫章黃國琦較釋

銓選部

考課第一

唐德宗建中二年六月門下侍郎平章事盧杞奏准  
六典中書舍人給事中充監中外官考使重其事也  
今者有知考使無監考使伏望依前置監中外官考  
使依奏

冊府元龜 銓選部



丹房元壽考課一  
貞元元年九月以刑部尚書關播吏部侍郎班宏爲  
較內外官考使

十二月詔六品以下本州申中上考者納錢一千文  
市筆墨朱膠等者元置五分生利吏部奏見用有餘  
自今以後其外官考錢並請勒停依奏

二年九月考功奏較京官外官考使准舊例差定聞  
奏勅其較考使宜停其考課付所司准式較定

三年五月詔以停減天下官員其停官計日成考兩  
考准舊成資准嘗式兩考以下至來年五月三十日  
處分

四年正月一日制戶口增加田疇廣闊者長吏加一  
階縣令減選優與處分其額內官勿更注擬見任者  
三考勒停

五年正月司勳員外郎判考功趙宗儒復行貶考之  
人自至德已來考績失實朝官刺史悉以中上考褒  
之善惡不別及是右司郎中獨孤良器殿中侍御史  
杜倫各以過犯免官尚書右丞裴郁御史中丞盧侶  
考之中上宗儒抗令又貶良器及倫考居中中又祕  
書少監鄭雲逵考其同官孫昌裔入上下宗儒覆按  
其考降入中上以雲逵褒進失中考之中以儆之又



刺史覈其課效考之中上者不過五十人餘貶入中  
中褒貶稍明人知誠懼帝善之遷考功郎中

六年六月三日考功奏准天寶七年六月勅內外官  
初考無赴上日末考不具得替便注破不在較限  
是月又奏諸使下兼憲官及簡較郎官并諸色官充  
職掌者竝仰本使每年具在使功課兼具考第申省  
十一月制守宰之任弊在數更自今刺史縣令以四  
考爲限

七年八月考功奏准考課令諸司官皆據每年功過  
行能定其考第及准開元天寶以前勅朝官每司有

中上考亦有中中考自三十年來諸司竝一例申中  
上考且課績之義不合雷同事久因循恐廢朝典自  
今以後諸司朝官皆須據每年功過行能仍比類格  
支定其升降以書考第不得一例申中上考應諸司  
長官書考不當三品已上具御牒上中書門下四品  
以下依格令各准所失輕重考

是月考功奏准諸司官皆據功過定其考等自至德  
後一切悉申中上考今請覆其能否以定升降從之  
自諫議大夫給事申郎官有書中中考者尚書左丞  
趙退翁言前薦果州刺史韋誕坐賊廢請降其考較



考使吏部尚書劉滋以退翁能言其過奏中上考  
 十二月較外官考使奏准考課令三品以上及同中  
 書門下平章事竝奏取裁注云親王及大都督亦同  
 伏詳此文則職位崇重考績褒貶有司皆合上奏今  
 緣諸州刺史大都督府長史及上中下都督都護等  
 有帶節度觀察使者方鎮既崇名禮當異每歲考績  
 亦請奏裁其非節度觀察州府長官有帶臺省官者  
 請不在此限

八年七月右僕射崔寧書兵部侍郎劉迺上下考刑  
 部侍郎兼京官較考使班宏正議曰今夷荒靖難專

在節度尺籀伍符不較省司夫上多虛美之名下開  
 趨競之路上行阿容下必朋黨因削去之迺謝之曰  
 迺雖不敏敢掠一美以徼二罪乎

十月以刑部尚書劉滋為較外官考使吏部侍郎杜  
 黃裳為較京官考使給事中李選宜監京官考中書  
 舍人鄭珣瑜宜監外官考

九年七月制縣令以四考為限無替者宜至五考

十年二月刑部奏准建中元年正月十七日勅諸州

府五品以上正員及額內上佐宜四考停其左降官  
 不在此限者五品左降官既不許停祿料六品以下



未復資已經四考者未量移間其祿料伏望亦許准  
給勅下祿料宜准天寶六載七月十四日勅處分餘  
依嘗式

憲宗元和十四年十一月考功奏自今以後應注考  
狀但直言某色行能某色異政某色樹置某色勞效  
推斷某色獄糾舉某色事便書善惡不得更有虛美  
閑言其中以下考亦各言事狀竝不得失於褒貶如  
違據所失輕重准令降書考官考又奏自今以後其  
有政能卓異清苦絕倫者不在止於上下考限依奏  
又奏據寶應二年勅御史臺分察使及諸道觀察使

訪察官吏善惡功過稍大事當奏聞者每年九月三  
十日具狀報考功功過雖小理當懲勸者按成卽報  
考功至較日叅驗事迹以爲殿最伏以近日功過都  
不牒報今後諸司不申報者州府本判官便與下考  
在京諸司進節級科處本判官較課日量事大小黜  
陟勅旨從之

穆宗元和十五年正月卽位十二月尚書考功員外  
郎權判郎中事李渤較定京官考請行昇黜上言曰  
宰臣蕭俛敗文昌崔植等當陛下君臨之初首任宰  
相安危理亂決在此時况陛下思天下和平敬大臣



禮功故未有昵比左右侈蒲自賢之心而宰相之權  
宰相之事陛下以付之實宣化理千載一遇之時  
也此時若失恐更無時而俛等上不能推至公明誠  
陳先王道德以諧君心又不能正色匪躬振舉舊法  
復百司之本則教化不立矣臣聞政之廢興在於賞  
罰俛等作相已來未聞獎一人德義舉守官奉公者  
使天下在官之徒有所勸又不能黜一人職事不理  
持祿養交者使尸祿之徒有所懼如此則刑法不立  
矣邪正莫辨混然無章教化不行賞罰不設天下之  
事復何望哉一昨陛下畋遊幸驪山宰相與翰林學

士是陛下股肱心腹宜皆知之俛等不能先事赤形  
忘軀懇諫而使陛下有忽諫之名流於史冊是陷君  
於過也孔子曰所謂大臣者以道事君不可則止若  
俛等言不行計不從須奉身疾退不宜尸素於化源  
進退矣也何所避辭其蕭俛段文昌崔植三人并翰  
林學士杜元穎等竝請賜考中下御史大夫李絳左  
散騎嘗侍張惟素右散騎嘗侍李益等諫幸驪山鄭  
覃等諫畋遊是皆恐陛下行幸道途漸遠自此恣情  
無度又思馬有銜繫不測之變風寒生疾之憂急奏  
無所詣國璽委婦人中幸之手絳等能率御史繼以



兩省官大諫於朝有懇激事君之禮可以誠無言者其李絳張惟素李益三人請賜上下考外特與遷官以彰陛下優忠賞諫之美其崔元畧冠供奉官之首合考上下緣與于翬上下考于翬以犯賊處死准令須絳請賜考中中大理卿許季同任使于翬韋道汴韋正牧皆以犯賊或左降或處死合考中下然頃陷劉闢之亂棄家歸朝忠節明著今宜以功補過請賜考中中少府監裴通職事脩舉合考中上以其請追封所生母而舍嫡母是明罔於君幽欺其先請賜考中下伏以昔者宰夫入寢擅飲師曠李調今愚臣守

官請書宰相翰林學士下考上優聖運下振頽綱故臣懼不言之為罪不懼言之為罪也今其三品官考伏緣限在今月內進輒先具如前其四品已下官績具條流聞奏狀入留中不下未幾渤以墜馬傷足請告中書門下帖刑部郎中馮宿權判考功宿以宰臣及三品已下官故事內較遂別封以進翰林學士職居內署事莫得知請依尚書上考諫官御史亦請仍舊茲書中上考乃與李渤所奏異矣國朝考課令凡較考以一年善惡為上下郎中較京官四品以下得隨事昇黜三品以上通名清望官每歲進名內定不



在宥有司渤雖欲振舉官業然事無故實又通舉佗年  
事以定褒貶不達者以為朝廷盛事帝雖甚怒而宰  
相等引過救解然後得免焉尋出為處州刺史

長慶元年正月制自今郡守恪奉詔條清廉可紀四  
考與轉

李渤為考功員外郎穆宗初書宰相等下考長慶元  
年五月貶渤為處州刺史渤既請書宰臣等下考時  
人以宰輔曠官不上疏陳列而越職釣奇非盡事君  
之道至是杜元穎等奏渤賣直沽名動多狂躁遂出  
之

文宗太和元年正月勅諸道節度觀察使去任日宣  
其交割狀仍限新人到任一月日分析聞奏并報中  
書門下據新舊狀磨勘聞奏以憑殿最

二年十月吏部侍郎楊嗣復李宗閔書員外楊虞卿  
考上下至是左僕射平章事王播判云據楊員外課  
績事有司准勅見今推窮竝未申奏其間得失須候  
聖裁遽此直書豈為至敬所書考待進止

六年七月勅今後諸州五品長為推知者推知正授  
通計六考滿停其勒留官未滿六考停給課料者准  
此卻給



七年七月中書門下奏應諸州刺史除授序遷須憑顯效若非責實無以勸人近者受代歸朝皆望超擢在郡理績無繇盡知或自陳制置事條固難取信或別求本道薦狀多是徇情將明典章在覈名實伏請自今以後刺史得替待去郡一箇月後委知州上佐及錄事參軍各下諸縣取耆老百姓等狀如有興利除害惠及生人廉潔奉公肅清風教者各具事實申本道觀察使簡勘得實具以事條錄奏不得更爲文飾其文狀仍與觀察判官連署如事無可稱者不在薦限仍望委度支鹽鐵分巡院周訪察各申報本使

錄事如除授後訪知所與今不實觀察判官分巡院及知州上佐等竝停見任一二年不得敘用如緣在郡贓私事發別議處分其觀察使奉取進止所與吏皆稟法人獲又安遷擢之時更無濫授制從之

八月詔考課之法前王所重蓋以綜覈吏理勵精政途名實苟違將何沮勸宜准故事置內外知考使兼令中書舍人給事中各一人監考

九月以吏部尚書令狐楚爲較內官考使中書舍人崔郾爲監內官考使以兵部尚書王起爲較外官考使以給事中高銖爲監外官考使行舊典也



開成四年六月河陽節度使李執方奏管內縣令有  
纔經一考已替者失考績黜陟之義請無犯者留至  
三考從之

宣宗會昌六年五月制刺史交代之時非因災沴大  
郡走失七百戶已上小郡走失百戶已上者三年不  
得錄使兼不得更與理人官增加一千戶已上者與  
超資遷改仍令觀察使審勘詣實聞奏如涉虛妄本  
判官重加懲責

大中元年正月制曰守宰親人職當撫字三載考績  
著在格言貞元之中頗有明詔縣令五考方得改移

近者因循都不遵守諸州或得三考畿府罕及二年  
以此字人若爲成政道途郡吏有迎送之勞鄉里庶  
民無蘇息之望自今須滿三十六箇月永爲常式

六年七月考功奏近年諸州府及百司官長所書考  
第寮屬竝不得知昇黜之間莫辨當否自今以後書  
考後但請勒各牒於本司本州懸於本司本州之門  
三日其外縣官則當日下縣如有昇黜不當便任敷  
陳其考第須便改正然得申省如勘覆之後事無乖  
謬則論告之人亦必懲殿又准考課令凡官人申考  
狀不得過兩紙刺史縣令至於賦稅畢集判斷不滯



戶口無逃散田畝守嘗額差科均平廨宇修飾館驛如法道路開通如此之類皆是尋嘗職分不合計課自今已後但云所勾當嘗行公事竝無敗闕卽得准職分無失及開田招戶辨獄雪寃及新制置之事則任錄其事繇申上亦須簡要不得繁多又近年以來刺史皆自錄課績申省矜銜者則張皇其事謙退者則緘默不言自今以後其巡內刺史請竝委本道觀察使定其考第然後錄申本州不得自錄課績申省又州府申官人覆得寃獄書殊考者其元推官人多不懲殿或云書下考至此又不提舉請自今以後書

辨獄官人殊考日便須書元推官下考如元推官自以爲屈任經廉使及臺省陳論其官人先有殿犯官長斷云至書考日與下考者如至時不舉其本州判官當書下考其所申到下考省司較其所犯如與令式相符便較定申奏至勅下後竝須各牒州府又近日諸州府所申令錄課績至兩考三考以後并須重具從前功課申省以與褒昇省司或簡勘不精便有僥倖自今以後不得輒更具從前功績申上又近日諸州府所申考解皆不指言善最或漫稱考秩或廣說門資既恥令文實爲繁弊自今以後如有此色竝



請准令降其考第又准考課令在中上以上每進一等加祿一季中中者守本祿中下以上每退一等奪祿一季准令以此懲勸事在必行近年以來與奪幾廢或有申請之處則言無本色可支徒掛簿書竟無給與今案倉庫令支給糧祿皆以當處正倉充無倉之處則申省隨近有處支給又無者聽以稅物及和糴屯收等物充令式昭然不合隳廢自今以後每省司較考畢符牒到州後仰當時便具升降與奪事繇申請如違令式不舉明者其所繇官請奪俸祿一季其已去任官進奪祿事竝請准令式處分又准考課

令官人因加戶內及勸田農并緣餘功進考者於後事若不實縱經恩宥其考皆從追改追改之事迺皆不行自今以後竝請准令式處分其因此得官者仍請追奪又諸道所申考解從前十月二十五日到都省都省開拆郎官押尾後至十一月末方到本司開拆多時情故可見自今以後伏請淮南曹及禮部舉選解例直送當司開拆又從前以來應得考之人竝給考牒以爲憑據近年考使容易給牒不一或一人考牒數處請給或數年之後方始請來自今以後較考勅下其得殊考及土考人省司便據人數一時與



修寫考牒請准吏部告身及禮部春官牒每人各出錢收贖其得殊考者出一千文上考者出五百文其錢便充寫考牒紙筆雜用以前件事條等或出於令文或附以近勅酌情揣事不至乖張謹竝條例進上伏乞宣付中書門下請更叅詳苟俾至公乞賜収采仍請三年一度准舉選格例修定頒下勅考功所條流較考功事頗謂詳悉唯一件難便允從近日俗尚矜能人少廉恥若榜門許其論告則自此必長紛爭當否之間固有公議其一件宜落下餘依奏

懿宗咸通四年正月大赦節文邦伯之任郡守之官比遣頒條當求共理近或不終年限非時多議替移其政未成在理難責自此委中書待其三考方可再遷免吏民迎送之勞表能否升降之道除煩就省無尚於斯

十四年考功員外郎王徽以舊例考簿上中下字朱書吏緣爲姦多有楷改請以黑書從之

昭宗天祐元年四月制刺史縣令有勸課農桑招復戶口一倍已上於前者委本道觀察使條件奏聞當加進陟如貪墮不理害及於人者速使停替

後唐明宗天成元年十月吏部侍郎盧文紀上言請



內外文武臣寮每歲有司明定考較將相乞廻御筆以行黜陟流下中書門下商量宰臣奏請施行從之是月尚書考功條奏格例如後一准考課令諸內外文武官九品以上每年當司長官考其屬官應考者皆具錄一年功過行能議其優劣定九等考第京官九月三十日已前較定外官去京一千五百里內八月三十日已前較定三千里內七月三十日已前較定五千里內五月三十日已前較定七千里內三月二十日已前較定萬里內正月三十日已前較定本州定訖京官十月一日送簿外官朝集使送限十月

二十五日已前到京考後功過並入來年無長官次

官考縣令已下及關鎮戍官岳瀆令並州考津非隸監者亦州考一准考課令諸每年考簿集日考司較

勘色別為簿具言功過京官三品已上及同中書門

下三品并平章事奏裁親王及五大都督府亦同四品已下及餘

外並使人量定聞奏上考下考奏單數仍畧狀進

中考並單名錄奏一准考課令諸每年尚書省諸司

得州牧刺史縣令政有殊功異行及祥瑞災蝗戶口

賦役增減當界豐儉盜賊多少並錄送考司一准考

課令諸官人景迹功過應附考者皆須實錄其前任



有犯私罪斷在今任者同見任法卽改任應計前任日爲考者功過竝附其狀不得過兩紙州縣長官須言戶口田地者不得過三紙注考正之最一最已上有四善爲上上一最已上有三善或無最而有四善爲上中一最已上有二善或無最而有三善爲上下一最已上有一善或無最而有二善爲中上一最已上或無最而有一善爲中中職事粗理善最不聞爲中下愛憎任情處斷乖理爲下上背公向私職務廢闕爲下中居官諂詐及貪濁有狀之類爲下下若於善最之外別有可嘉及罪雖成殿而情狀可矜或雖不成殿而情狀可責者省較之日皆聽考官臨時量定一准考課令諸官人因加戶口及勸課農桑并緣餘功進考者於後事若不實縱經恩降皆從追改一准式較京官考限來年正月內外官考限二月內者所司至三月內申奏了畢伏以書較內外官考課逐年申送考簿各有程期近年已來諸道州府及在京諸司所送考解多是稽違自今後所申送考簿如違格限二十日不到其本判官并錄事參軍伏請各罰一百直本典勾官請委本道科責如違一月日已上不申到者本判官伏請罰二百直錄事參軍量殿一



選本典勾官請委本道重加懲斷在京諸司如違格  
限不關牒到者其本行人吏牒報御史臺請行追勘  
決責一准格應所使闕縣令計日成四考餘官計日  
成三考闕今後州縣官等竝許終三十箇月成三考  
自上官後至年終但滿一百八十日便與成頭考次  
二年卽須兩考滿足如頭考第二考全足卽許計日  
成尾考方與三十箇月事理合同如過月限無替人  
到准上條處分者伏以每年書較官員考課格限則  
顯有舊條授上則難爲定制但以每月之內皆有除  
移今准格且以六月內上爲准一應申較內外六品

已下赴選官員考課准格自上任後但滿一百八十  
日便與成頭考年終非書考時須至來年准格書較  
時併申兩考如六月已前直至正月到任者自上任  
日至較考時頭考日足卽考後功過竝入來年如至  
書較時頭考欠日未成資考亦至來年准格書較時  
併申兩考如六月已後至年終上者竝至准格日收  
計一考有剩日不在重使之限一應經考後合收次  
年以一周歲爲限如未滿一年停替者但及二百四  
十日與成如欠一日不在收計限一應收尾考但經  
考後至去任時得及二百日與成如欠日不在收計



限如過月限無替人到竝准上條處分一應申較內  
外赴選官員考課頭考須具到任年月日自上以來  
功過第二考須具經考已後課績不得重疊計功其  
末考須具得替年月日比類申降一應申較內外六  
品以下官員考第以去京地里遠近逐年書較申送  
考解各有程期今後應內外赴選官員考第既准格  
依限逐年比較卽不合更將州府及本司考牒爲據  
其有已前罷任官員不計年限考第未經省較者如  
有州府及本司考詞考牒全備者欲據在任年月日  
簡勘省司給與牒知如在任之時州府及本司向來  
元不曾較給牒只於牒繇曆子內批出考數者欲與  
簡勘解繇曆子內不豎過犯稱在任日并無公事遺  
闕證驗分明亦據在官年月日給與牒知如簡勘無  
憑者不在給牒之限其今年各准格赴集選人便合  
請給省較考牒直至南曹受納告亦給已竝許經所  
司投狀簡勘出給其考牒又准格須奏下當年內出  
給如隔年者不在行使之限如或實有事故年內請  
給故難請自今後當年奏下勅考許至來年內請給  
如更違格限請一年與殿一選如至三年外不請給  
者所司不在出給之限其已前較奏下內外赴選官



員考課其間有未曾請給考牒者竝合投狀請給以備選曹磨勘如將來選人今任考第依前故違格條不經省司勘較給牒及已曾奏較下勅考不曾給考牒者南曹不在簡勘判成之限一應申較內外官員考課文解須依格限到省如申發後其間或有非時事故停任省司無以得知請委本判官并錄事參軍專切提舉具事繇申省以憑點簡錄奏一准故事較考舊條內外官員竝較之時諸道差朝集使應考內卽差中書舍人給事中監考伏自較勘不行往例全廢自今後省較之時伏請中書門下選差清望官兩

員監較內外官員考課便同點簡申奏其合經過中書門下兩省准例各供宣黃請守舊規以爲永制一應繇較內外官寮考課如有過犯便降書下考如在任之日於嘗課之外別有異績可稱比之上下考如諸道州府及在京諸司固違格條不具錄在任事績功過依限比較申牒到省其本判官并錄事參軍及在京諸司本行竝請准前殿罰一應諸司諸色流外職掌人等准令本司量其行能功過立四等考第而勉進之今狀請准新定格內條件逐年依限投狀各具在職功過書較考第簡勘錄奏應諸司令史及勒



留官丁憂不計有官無官竝一百日後舉追如願終喪不在追限除丁憂年一考不附奏次年便許選數赴集其丁憂人仍牒考功及南曹終喪者計三年憂諸色選人使上考減選其下考竝合殿選竝注令錄銓曹勘驗只憑考功報簡多有差錯今請每年考功申較上考及下考勅下後請具單名牒門下省及申三銓關報南曹以憑勘會竝須九月已前報畢勅旨從之

三年四月祠部郎中王承弁請明書兩班考課顯示懲勸時兩班考績虛有其名皆以恪勤匪懈清慎明著為詞久無其實承弁雖奏終不改定

長興四年五月中書奏准天成元年五月二十七日勅諸使府兩稅徵科詳斷刑獄較官吏考課合是觀察判官專判其一州諸縣徵官糾轄提舉合是錄事參軍本職今後觀察判官錄事參軍較量所屬州縣官吏據每年徵科程限刑獄斷遣戶口增減據州縣申報子細磨勘詣實然後於本官牒內據事件收堅如官吏考課一一事實其判官錄事參軍候考滿日竝與酬獎別加職任如考課不實亦行殿罰如有水旱災傷處許奏聽勅旨從之



末帝清泰二年四月宰臣張延朗奏州縣官徵科賞  
罰例縣令錄事叅軍正官一年依限徵科了絕加階  
二年依限與試銜三年摠及限與服色如攝令一年  
內了絕仍攝二年三年內摠及限與真命主簿一年  
二年如縣令條三年摠了別任使本判官一年加階  
二年改試銜三年轉官本曹官省限內了絕與試銜  
轉官諸節級三年內摠了絕與賞錢三十千其賞罰  
依天成四年五月五日勅從之

九月尚書考功上言今年五月中翰林學士程遜所  
上封事內請自宰相百執事外鎮節度使刺史應係  
公事官逐年書考較其優劣以前件考課究尋臺閣  
深遠歲年若議興行宜憑往制具錄中書門下宰臣  
判設官分職各有所司本司自合將條格故實詳叅  
更簡尋遠勅條奏定爲悠久緣本司公事遂簡尋唐  
書六典會要考課令書考第從之

三年五月右街使兼判尚書考功郝瓊上言去年五  
月詔中外官員自宰臣節度使已下並逐年書考課  
許官員千餘當司人吏四人二人赴官又公用不足  
乞依三銓例當司歸司官逐月交賜紙筆糧錢詔考  
功人吏兩人依三銓例給及春冬衣兩分諸司不得



爲例

晉高祖天福二年正月勅外官內官陳力實關於共  
理或出或處藉才難執於嘗規近觀朝臣偶除外任  
三年替罷之後再來擬官之時不計新職之勤勞唯  
循舊官之資歷比藉幹濟翻成滯淹宜別立於規繩  
貴各期於激勵宜今後應朝臣中有藉材特除外任  
者秩滿無遺闕將來擬官之時在外一任同在朝一  
任昇進其就便自求外職及不是特達選任者不在  
此限

六年五月詔曰王者行考績之文重爲政之本若存  
功課自有旌酬或伏鉞守方著安民之術或剖符刺  
部彰恤物之仁凡著政聲悉聞朝聽邇者數州百姓  
舉留本部長官遂涉道途徑趨京闕皆陳善治竝述  
公清或指使而方來或感激而自至勞煩行役妨廢  
耕耘言念苦辛倍深軫憫今後岳牧善政委倅二官  
條件奏陳必當旌別勤勞審詳課最如不愆於名實  
固無愆於渥恩

少帝開運元年八月詔曰向者朝廷無事經費尚多  
今則師旅方興支贍尤廣必資國力以濟軍須近以  
四海災傷頻年饑饉賦租減少筦權虧懸帑藏不充



公私重困今歲三時不害百穀用成所在流民漸聞  
歸業商旅之人稍衆山澤之利咸通郡邑徵科自然  
容易務場課額必有增盈較量之間斷可知矣牧宰  
之任選擢非輕至於阜俗康民豐財益國乃爲本職  
固合用心苟能一一躬親孜孜臨蒞必絕滯疑之事  
兼除僥倖之門副我憂勤顯爾政績將求課最須設  
科條况藩侯郡守等皆是良臣各膺重委盡傾誠設  
以奉國朝式當倚注之時宜示勸懲之道應天下諸  
州各以係省錢穀秋夏徵科爲帳籍一季一奏一年  
賦稅及限更委在任一年次年又不稽逋聽三周年  
爲滿三年皆得辦事卽與別議陟遷如或纔到任所  
課績不前亦當卽時罷替其間災沴之地須明具數  
陳審其虛真別有處分於戲朕纘承大業于茲三年  
虔奉其局不敢失墜兢兢業業若履春冰小信未孚  
咎徵斯降旱蝗相繼連歲爲災兵革未寧四方多事  
下慙黔首仰愧蒼穹所賴將相公卿元戎郡守或先  
朝宿舊或當代英賢送往事居始終如一分憂共治  
誠節彌堅倚賴旣深傾輸亦至必能爲國盡忠臨事  
公勤不更假於指縱固自知其陳力凡百有位宜體  
朕懷



漢隱帝乾祐二年太子中允侯仁寶上言諸州府長吏勸課農桑隨戶人力勝栽蒔桑棗小戶歲十本至二十本中戶三十至四十大戶五十至一百如能勝裁不限本數種訖本縣令佐親省之計數得替時交與受代者仍於曆子內批書省司以爲考課

三年七月勅親人之任務在安民經國之規必資徵賦至於招添戶口增長稅租減選加階優有處分勸能行賞顯降勅文邇來論課績者甚多較虛實則未當外州批上曆子南曹磨勘解繇空收招到編民莫見新添稅額盖有拆居耕種各立戶名或是避稅逃

務併未歸業所以虛添農戶無益官租考課涉名未盡其善宜令吏部南曹自今後及已前應有令佐招添點簡出戶口據數須本處戶合徵稅賦物數日於解繇曆子內一一開坐批書方得准天福八年三月十日勅條施行如不合前後勅例不在施行之限周太祖廣順二年十二月二十八日勅節文其有省較考牒如是奏下後滿三年不請給者宜令考功准先降勅文不在出給之限

三年三月十四日勅起今後諸州府更有供申考簿違格限申到者本判官并錄事參軍各罰五十直其



錄事叅軍仍殿一選本勾押官典委本州并行科斷如違程限一月已上不申到者仍令尚書考功催促候供申到考帳依例施行所有科罰准前處分若是較考過時卽與次年依格奏較

是月尚書考功上言當司所納諸道考課文帳准格每年十月二十五日已前考帳到京如違格限本處官吏各行殿罰其鳳翔府自廣順元年十月九度移文爲考帳全不詳認格條遂申中書門下請勅令鳳翔府稱違格限二十餘日已次罰官典申到考帳當司准格違限不叙勅鳳翔考帳違限本府各以科徵

其考帳省司特與考較起今後諸州府更有違限者本判官錄事叅軍各罰五十直錄事叅軍殿中選典押本處科斷仍令省司依時催促若較考過時卽與次年較奏餘依前後格勅指揮又勅州縣官或特勅除授或非時有故停任員闕除官到任者緣赴任不拘期限申發考帳之時但滿一周年便與依例書較一考申省如書較時少欠月日卽與次年附帳申較不得漏落考第姓名如或有違罪本道書考官吏顯德五年閏七月尚書考功奏奉新勅起今年正月一日後授官竝以三周年爲月限閏月不在其內者



當司所書較內外六品下赴選官員考第今後以一  
周年較成一考如欠日不在計限滿三周年較成三  
考如考滿後未有替人在任更一周年與成第四考  
如欠日不在計限兼逐年須具到任年月日自上已  
來課績功過第二考須具經考後課績不得重疊計  
功其未考須具得替年月日比類升降自今年正月  
一日已前授官到任者欲准格例三十箇月書較三  
考今年正月一日後來授官到任者准新勅三周年  
爲月限每一周年書較一考閏月不在其內所有諸  
道州府較考申發考帳及當司較奏各依前後格勅

施行應諸司諸色流內出身人等准格竝須待附申  
考近年不經奏考便至參選頗啓俸門應在司見役  
人等自今後逐年起六月初一日後正身於所司投  
狀請申較勞考省司據狀却牒本司勘會補奏年月  
日勅甲頭姓名見掌案分公事牒報省司將元狀簡  
勘同卽與准例申較仍自此後須逐年九月已前較  
奏了畢不在更與隔年併書之限其考牒本無綾紙  
書寫勅例今後每年奏下逐人給省牒一紙使大張  
紙書不在使綾紙及併年都給限據省較勅之日有  
公事在外差出不虛卽本司雜事須具在職功過及



出外事繇牒報考功不得有妨逐年書較如不與申牒其雜事令史量情科決仍殿一選如無故自不經省投狀請奏較不在論訴之限者當司緣新勅促期限慮恐較考遲違今後應合較考人請起自五月一日正身投狀限十日畢至七月三十日已前較奏畢餘依元格施行從之

冊府元龜

淮南李嗣京參閱

西極文翔

豫章黃國琦較釋

銓選部 九

公望 平直 振舉

公望

銓衡刷地總覈九流所以辯進官材翊贊邦治降自漢人委授彌重莫不妙選明識登用能臣故有負高亮之姿振清正之望鑒擇髦儔動叶於至公抑退浮



華靡私於貴勢俾時材各適其用天下共稱其平  
云靖恭爾位好是正直其是之謂與

魏賈詡為尚書典選舉多選舊名以為令僕論者以  
此多詡

崔坎字季珪清忠高亮雅識經遠端方直道正色於  
朝魏氏初載委授銓衡總齊清人十有餘年文武羣  
才多所明拔朝廷歸高天下稱平

毛玠字孝先太祖為丞相玠為東曹掾與崔琰並典  
選舉用皆清正之士雖於時有盛名而行不繇本者  
終莫得進務以儉率人繇是天下之士莫不以廉節

自勵雖貴寵之臣輿服不敢過度太祖歎曰用人如  
此使天下人自治吾復何為哉文帝為五官將親目  
詣玠屬所親眷玠答曰老臣以能守職幸得免戾今

所說人非遷次是以不敢奉命大軍還鄴議所并省  
玠請謁不行時人憚之咸欲省東曹乃共白曰舊西

曹為上東曹為次宜省東曹太祖知其情令曰日出  
於東月盛於東凡人言方亦復先東何以省東曹玠

遷右軍師魏國初建拜尚書僕射復典選舉

先賢行狀曰玠

雅亮公正在官清恪其典選舉拔貞實斥華僞進遜  
行抑阿黨諸宰官治民功績不著而私財豐足者皆  
免黜停廢久不選用于時四海翕然莫不勵行至  
長吏還者垢面羸衣裳乘柴車軍吏入府朝服徒行



人擬壺殮之潔家象濯纓之操貴者無穢欲之累賤者絕姦貨之末吏潔於上俗移於下民到于今稱之袁侃歷選部郎中號為清平

晉李重與李毅同為吏部郎時王戎為尚書重以清尚見稱毅淹通有智識雖二人操異然俱處要職或以識會代之各得其所

李喬為吏部清慎選舉號為廉平

阮放字思度為黃門侍郎選吏部郎在銓管任甚有稱績

盧欽為尚書僕射領吏部舉必以材稱為廉平

周覆遷吏部郎選舉精密論望益美

蔡克字子尼為東曹掾素有格量及居選官苟進之

徒望風畏憚

宋王惠為吳興太守少帝卽位以蔡廓為吏部尚書不肯拜乃以惠代焉惠被召卽拜未嘗接客人有與書求官者得轉聚置閣上及去職其封如初時談者以廓之不拜惠之卽拜雖事異而意同也

謝莊代顏竣為吏部尚書竣留心選舉自強不息任遇既隆奏無不可而容貌嚴毅莊風姿甚美賓客喧訴嘗權笑答之竟多不行時人為之語曰顏竣嗔而與人官謝莊笑而不與人官



梁徐勉為吏部尚書勉居選官彝倫有序嘗與門人  
夜集客有虞曷求詹事五官勉正色答云今夕止可  
談風月不宜及公事故時人嘗服其無私

又云勉為尚書僕射

爰自小選迄于此職嘗  
參掌衡石甚得上心

到漑掌吏部尚書時何敬容以吏參選事有不允漑  
輒相執敬容謂人曰到漑尚有餘臭遂學作貴人敬  
容日方貴寵人皆下之漑訐之如初漑祖彥之初擔  
糞自給故世以為譏云

王泰為都官尚書能接人士士多懷慕每願其居選  
官頃之為吏部尚書衣冠傾屬

王亮為吏部郎銓序著稱

後魏崔亮為給事黃門侍郎仍兼吏部郎領青州大  
中正亮自參選事垂將十年廉慎明決為尚書郭祚  
所委每云非崔郎中選事不辨辨

北齊楊愔為給事黃門侍郎兼吏部郎中武定末以  
望實之美起拜吏部尚書加侍中衛將軍侍學典選  
如故

辛術為吏部尚書遷鄴以後大選之職知名者數四  
互有得失未能盡美文襄帝少年高朗所弊也疎袁  
叔德沉密謹厚所傷者細楊愔風流辯給取士失於



浮華唯術性尚貞明取士以才器循名責實新舊參  
舉管庫必擢門伐不遺考之前後銓衡在術最爲折  
衷其爲當時所稱舉如此

後周鄭孝穆魏大統中爲散騎嘗侍時文帝東討除  
大丞相府右長史封金鄉縣男軍次潼關命孝穆與  
左長史孫儉司馬楊寬尚書蘇亮諮議劉孟良等分  
掌衆務仍令孝穆引接關東歸附人士并品藻才行  
而任用之撫納銓敘咸得其宜

薛端爲吏部尚書端久處選曹雅有人論之鑒其所  
擢用咸得其才

隋高構仁壽初爲吏部侍郎以公事免煬帝立召令  
復位時爲吏部者多以不稱去職唯構最有能名前  
後典選之官皆出其下又云串弘爲吏部尚書高構  
爲侍郎最爲稱職

陸彥師開皇初爲吏部侍郎時承周制官無清濁彥  
師在職凡所任人頗甄別於士庶論者美之

唐杜如晦爲吏部尚書尋爲右僕射仍掌選事引用  
賢良甚獲當時之譽

劉林甫貞觀初爲吏部侍郎初隋代赴選者以十一  
月爲始至春卽停選限所促選司多不究悉時選人



漸衆林甫奏請四時聽選隨到注擬當時甚以爲便時天下初定州府及詔使多有赤牒授官至是停省盡來赴集將萬餘人林甫隨才銓擢咸得其宜時人以林甫典選比隋之高孝基

李安期前後三典選部頗爲當時所稱

楊纂爲吏部侍郎銓敘人倫稱爲允當

高季輔爲吏部侍郎凡所銓綜時稱允愜

裴行儉高宗朝爲吏部侍郎與敬玄馬載同時典選十餘年甚有能名時人稱焉

李敬玄爲司列少常伯典選累年銓綜有序天下稱其能

姚壽武后時爲天官侍郎善選補于今稱之

盧從愿睿宗初爲吏部侍郎以中宗之後選司頗失綱紀從愿精心循理大稱平允其有冒名僞選及虛增功狀之類皆能擿發其事典選六年前後無及之者初高宗時行儉馬載爲吏部最爲稱職及是從愿與李朝隱同時典選亦有美譽時人稱曰吏部前有裴馬後有盧李

韋沆爲邢部尚書頻年典較京外官考使前後咸稱允當



宋璟爲吏部侍郎同中書門下三品玄宗在春官又兼右庶子先是外戚及諸公主等干涉朝政請託滋甚崔湜鄭愔等相次典選皆爲權門所制九流失敘迎用兩年員闕注擬不足更置比冬選人大爲士庶所歎至是璟大革前弊取捨平允銓綜尤是有敘李林甫爲吏部侍郎天下昇平每歲選人填委林甫脩廢舉直甄別流品時議以爲稱職改黃門侍郎徐浩爲都官郎中掌選嶺南以廉平稱

于部爲北部郎中嘗署考第於吏部以公當稱

劉滋爲吏部侍郎有經學善持論性廉潔劾理穢惡嘗掌選多所發擿更代詐僞者尤畏之

韋弘景爲吏部侍郎銓祿平允權邪憚其嚴勁不敢干以非

崔郾爲吏部員外郎銓敘之美爲時所稱

後唐韋寂爲水部員外郎判南曹移浚儀令累選吏部郎中復判南曹吏畏其明

平直

夫政之敗繇官之邪前典之深戒也若夫式敘流品銓管人才漢魏以還實重其任乃有善於其職不懈其位爲官擇人抑華崇本清濁有別名實以覈寒素



無下品之歎浮薄杜私謁之選不以親疎而易意不  
爲勢力之所奪介然不撓處事惟允考言底績抱公  
滅私才能適用怨亦不作繇是當時號爲得士天下  
無有滯才茲所謂邦之司直德服衆望守公率職之  
善者歟

後漢魯恭爲光祿勳選舉清平京師貴戚莫能枉其  
正

陳蕃爲光祿勳與五官中郎將黃琬共典選舉不偏  
權富而爲勢家郎所譖訴坐免歸

趙戡爲尚書典選董卓數欲有所私授戡輒堅拒不  
聽言色強厲卓怒召欲殺之衆人悚慄而戡辭親自  
若卓悔謝釋之

魏諸葛誕爲吏部人有所屬託輒顯其言而承用之  
後有當否則公議其得失以爲褒貶自是羣僚莫不  
慎其所舉

晉荀顛爲尚書時顛甥陳泰卒顛代泰爲僕射領吏  
部顛承泰後加之淑慎綜核名實風俗澄正

李密犍爲人爲州大中正性方直不曲意勢位後失  
荀勗張華指左遷漢中太守諸生多以爲寃

李重爲吏部郎詢朝衆而斥革競存公平而塞私謁



是以羣才罔不畢舉

劉毅爲青州大中正銓正人流清濁區別其所彈貶自親貴者始

張輔爲御史中丞梁州中正刺史楊欣有姊喪未經旬車騎長史韓預強聘其女爲妻輔貶預以清風俗論者稱之

江灌爲吏部郎時尚書謝奕銓敘不允灌每執正不從

王彪之爲吏部尚書時簡文以會稽王輔政有命用秣陵令典安遠補句容令熙中侍御史奚朗補湘東郡彪之執不從曰秣陵令三品縣耳殿下昔用安遠談者紛然句容近畿三品惟置豈可處卜術之人無才用者邪湘東雖復遠小所用未有朗比談者謂頗兼卜術得進殿下若超用寒悴當令人才可拔朗等凡器實未足充此選

王蘊爲吏部郎性平和不抑寒素每一官缺求者十輩蘊無所是非時會稽王輔政蘊輒連狀白之曰某人地某人有才務存進達各隨其方故不得者無怨焉

宋王球爲吏部尚書接客甚希不視求官書疏而銓



衡有序朝野稱之

庾炳之爲吏部郎時王僧達舉兄錫不協訴家貧求郡太祖欲以爲秦郡炳之曰王弘子旣不宜作秦郡僧達亦不堪蒞民乃止

王琨爲吏部郎吏曹選局貴要多所屬請琨自公卿下至士大夫例爲用兩門生江夏王義恭嘗屬琨用二人後復屬遣琨答不許

江湛爲吏部尚書在選職頗有刻覈之譏而公平無私不受請謁論者以此稱焉

王僧綽爲吏部郎叅掌大選究識流品諳悉人物拔才舉能咸得其分

南齊陸慧曉爲吏部郎曹中有都令史歷政以來諮執選事慧曉任已獨行未嘗與語帝遣左右單景雋以事請問慧曉謂景雋曰六十之年不復能諮都令史爲吏部郎也帝若謂身不堪便當拂衣而退帝甚憚之

梁張充爲吏部尚書居選稱爲平允

王泰爲中書侍郎歷給事黃門侍郎竝掌吏部郎事俄而卽真自過江吏部郎不復典大選令史以下小人求競者輻輳前後少能稱職泰爲之通關求吏先



至者即補不為貴賤請屬易意天下稱平  
王僧孺為尚書吏部郎參大選請謂不行  
何敬容為吏部尚書銓序明審號為稱職

褚翔居小選公清不為請屬易意號為平允

陳徐凌天祿初為吏部尚書以梁末以來選授多失  
其所於是提舉綱維綜覈名實時有冒進求官誼競  
不已者凌乃為宣示之曰自古吏部尚書者品藻人  
倫簡其才能尋其門胄遂其大小量其官爵梁元帝  
承侯景之凶荒王太尉接荊州之禍敗爾時喪亂無  
復典章故使官方窮此紛雜永定時聖朝草創干戈

未息亦無條序府庫空虛賞賜懸乏白銀難得黃札  
易營權以官階代於錢絹義存撫接無計多少致令  
員外嘗侍路上此扇謠議參軍市中無數豈是朝章  
應其如此今衣冠禮樂日當年華何可猶作舊意非  
所望也所見諸君多踰本分猶言大屈未喻高懷若  
問梁朝朱領軍昇亦為卿相此不踰其本分耶此是  
天子所拔非關選序梁武帝云世間人言有目色我  
特不目色范曄宋文帝亦云豈無運命每有好官缺  
輒憶羊玄保此則清顯職不繇選也秦有車府令趙  
高直至丞相漢有高廟令田千秋亦為丞相此復可



爲例耶既忝衡流應須粉墨所望諸賢深明鄙意自是衆咸服焉時論比之毛介

後魏任城王澄爲吏部尚書及車駕北巡留澄銓簡舊例自公侯以下訖以選臣動有萬數冗散無事澄品爲三等量其優劣盡其能否之用咸無怨者

元順爲吏部尚書時三公曹令史朱暉素事錄事尚書事高陽王雍雍欲以爲廷尉評頗煩託順順不爲用雍遂下命用之順投於地雍聞之大怒昧爽坐都廳召尚書及丞郎畢集欲待順至於衆挫之順日高方至雍攘袂撫几而言曰身天子之子天子之弟天子之叔天子之相四海之內親尊無二元順何人以

身成命拔棄於地須鬚鬢俱張仰面看屋僨氣奔湧長歎而不言久之搖一白羽扇徐而謂雍曰高祖遷宅中土剗定九流官方清濁軌儀萬古而朱暉小人身爲省吏何令爲廷尉清官殿下旣先皇同氣且遵成旨日有短垣而復踰之雍曰身爲丞相錄尚書如何不用一人爲官順曰庖人雖不理庖尸祝不越樽俎而代之未聞有別旨令殿下叅選事順又厲聲曰殿下必如是順當依事以聞雍遂笑而言曰豈可以朱暉小人便相忿恨遂起呼順入室與之極飲順之



毅不撓皆此類也

陸侯為給事中典選部蘭臺事當官而行無所屈撓  
封軌渤海人宣武帝時為考功郎中本郡中正渤海  
太守崔林入為吏部郎以凡考事于軌軌曰法者天  
下之平不可以舊君故虧之也休歎其守正

韋崇為司州及河南邑中正崇頻尹衡品以平直見  
稱

楊懿為選部給事中有公平之譽

宋弁字義和廣平人為黃門侍郎兼司徒左長史為  
本州大中正弁先與度支尚書李彪州里迭相祇好

結管鮑之交而以寒地處之殊不欲微相優假彪不  
以為恨及郭祚為吏部彪與子志求官祚仍以舊地  
處之彪以位經嘗伯又兼尚書謂祚應以貴遊拔之  
深用忿怨形於言色時論以此譏祚祚每曰爾與義  
和至交豈能饒爾而怨我乎  
一云郭祚為吏部所用者皆量才稱職時人以  
此歸之

李叔虎渤海人為國子博士本國中正攝樂陵中正  
性清直甚有公平之稱

北齊趙彥深為尚書令凡諸選舉先令銓定提獎人  
物皆以行業為先輕薄之徒弗之齒也



辛術爲吏部尚書文宣嘗令術選百員官參選者二  
三千人術題目士子人無誇譟其所旌擢後亦皆致  
通顯  
陽休之爲吏部尚書多識故事諳悉民族凡所選用  
莫不才地俱允

後周薛端爲吏部郎中自居選曹先盡賢能貴遊子  
弟才劣行薄者未嘗升擢之每啓文帝云設官分職  
本康時務苟非其人不如曠職帝深然之

隋盧愷爲周小吏部染工上士王神歡者嘗以賂自  
進冢宰宇文護擢爲計部下大夫愷諫曰古者登高  
能賦可爲大夫求賢審官理須詳慎今神歡出自染  
工更無殊異徒以家富自通遂與縉紳竝列實恐維  
鶉之刺聞之外境護竟寢其事

韋世康爲吏部尚書選用平允請託不行出爲襄州  
刺史歷安州信州總管入朝復拜吏部尚書前後十  
餘年間多所進拔朝廷稱爲廉平

高構爲吏部侍郎時人以構好劇談頗謂輕薄然其  
內懷方雅特爲吏部尚書牛弘所重後以老病解職  
特弘典選凡將有所擢用輒遣人就第問其可否  
牛弘爲吏部尚書其選舉先德行而後文才務在審



慎所進用多稱職

唐高士廉貞觀年爲吏部尚書獎鑒人倫雅諳姓氏凡所署用莫不人地俱允

韋承慶自天授以來三掌天官選事銓授平允海內稱之

高季輔爲吏部侍郎凡所銓敘時稱允當

崔玄暉爲天官侍郎介然自守絕於請謁爲執政者所忌轉文昌左丞選司令史乃設齋自慶武太后聞之復拜爲天官侍郎

劉竒爲吏部侍郎注張文成司馬鯉爲監察御史二人因申屠場以謝之竒正色曰舉賢本自無私二君何爲見謝

吉頊爲吏部侍郎陸象先本名景初爲揚州叅軍秩滿調選頊擢授雒陽尉時象先父元方亦爲吏部固辭不敢當頊曰爲官擇人至公之道陸景初才望高雅非嘗流所及實不以吏部之子妄推薦也竟奏授之

姜晦爲吏部侍郎性聰悟識理體舊制吏曹舍宇悉布棘以防令史與選人交通及晦領選事盡除之入開銓門示無所禁私引致者晦輒知之召問莫不首



伏初朝廷以晦改革前規咸以爲不可竟銓綜得所  
賄賂不行舉朝歎伏

席豫爲吏部侍郎玄宗謂之曰以卿前爲考功職事  
平允故有此授豫典選六年有令譽

韋陟爲吏部侍郎嘗病選人冒名接脚闕員旣少取  
士良難正調者被擠僞集者冒進陟剛腸嫉惡風彩  
嚴正選人疑其有瑕者陟按聲盤詰無不首伏每歲  
皆贖得數百員闕以待淹滯嘗謂所親曰使陟知銓  
衡一二年則無人可選矣又有一致仕官敘五品陟  
判之曰青氈展慶竝不立班朱紱承榮無宜臥拜時  
人推其強直

韋見素爲吏部侍郎在職公平選士美之

苗晉卿爲吏部侍郎拔異舉廢時稱平允

楊綰爲吏部侍郎歷典舉選精覈人物以公平稱

奚陟爲刑部侍郎知吏部選事銓綜平允有能名遷

吏部侍郎所蒞之官時以爲稱職

裴垣爲吏部考功二員外郎時吏部侍郎鄭珣瑜請

垣考調判垣堅守不爲時力所奪考覈皆務才實

楊於陵爲吏部員外郎判南曹時宰相有密親調習  
文書不如式於陵持而不與物論大歸之遷右司郎



中後爲吏部侍郎凡四周歲簡察奸吏調補平允至今人稱之

崔郾爲吏部員外奸吏不敢欺孤寒無援者未嘗留滯銓敘之美爲時所稱

孔緯昭宗時爲吏部侍郎居選曹動循格令權要有所託私書盈几不之省執政怒之改太常卿

晉史圭爲吏部侍郎分知銓事而圭素廉守太著公平時有前樂城浩令者年踰七十不能拜起有重臣達意且令與官圭不允其請人甚嘉之

### 振舉

振廢滯拔英雋有司之職也故刈其翹楚形之於風什揚彼側陋著之於典訓乃有雅望著於紳紱精識善其人倫處選士之曹當持衡之重唯善所在靡遺於葑菲類能而使必適於轅輪得其辨論之方盡諸藻鑒之美繇是械樸之詩載作邁軸之歎不與者焉後漢許靖爲尚書郎典選舉董卓秉政以漢陽周忠爲吏部尚書與靖共謀議進退天下之士沙汰穢濁顯拔幽滯進用穎川荀爽韓融陳紀等爲公卿郡守拜尚書韓馥爲冀州牧侍中劉岱爲兗州刺史穎川張咨爲南陽太守陳留孔伋爲豫州刺史東郡張邈



爲陳留太守

吳李肅字傳恭爲選部尚書選舉號爲得才

晉山濤武帝時爲吏部尚書前後選用周徧內外而並得其才濤再居選職十有餘年每一官缺輒啓擬數人詔旨有所向然後顯奏隨帝意所欲爲先故帝之所用或非舉首衆情不察以濤輕重任意或讚之於帝故帝手詔戒濤曰夫用人惟才不遺疎遠單賤天下便化矣而濤行之自若一年之後衆情乃寢濤所奏甄拔人物各爲題目時稱山公啓事嵇紹以父得罪靖居私門濤啓武帝曰康誥有言父子罪不相

及嵇紹賢侔卻缺宜加旌命請爲祕書郎帝謂濤曰如卿所言乃堪爲丞何但郎也乃發詔徵之起家爲祕書丞又胡原練習兵馬濤稱其才堪邊任舉爲太尉長史

李重爲吏部郎務擢華競不通私謁特留心隱逸錄是羣才畢舉拔用北海西郭湯瑯邪劉珩燕國霍原馮翊吉謀等爲祕書郎及諸王文學故海內莫不歸心時燕國中正劉沉舉霍原爲寒素司徒府不從沉又抗詣中書奏原而中書復下司徒參論左長史荀組以謂寒素者當謂門寒身素無世祿之資原爲列



侯顯佩金紫先爲人間通流之士晚乃務學少長異業年踰始立草野之譽未洽德禮無聞不應寒素之目重奏曰按如癸酉詔書廉讓宜崇浮競宜黜其有履謙寒素靖恭求已者應有以先之如詔書之旨以二品繫資或失廉退之士故開寒素以明尚德之舉司徒總御人倫實掌邦教當務峻準評以一風流然古之厲行高尚之士或栖身巖穴或隱迹丘園或克已復禮或耄期稱道出處默語惟義所在未可以少長異操用疑其所守之美而遠同始終之責非所謂儼人必於其倫之義也誠當考之邦黨之倫審之於任舉之主沉爲中正親執銓衡陳原隱居求志篤古好學學不爲利行不要名絕跡窮山韞韜道藝外無希世之容內全遜逸之節行成名立搢紳慕之委質受業者千里而應有孫孟之風嚴鄭之操始舉原先諮侍中領中書監華前州大中正後將軍嬰河南尹軼去三年諸州還朝幽州刺史許猛特以原名聞擬之西河求加徵聘如沉所列州黨之議旣舉又刺史班固表薦如此而猶謂草野之譽未洽德禮無聞舍所徵簡之實而無明理正辭以奪沉所執且應二品其所求備但願定志窮山脩述儒道義在可嘉若遂



州府志 振舉 卷之六十三  
柳替將負幽邦之望傷敦德之教如詔書所求之旨  
應爲二品詔從之

劉沉字道真燕國薊人太保衛瓘辟爲掾領本邑大  
中正敦儒道愛賢能進霍原爲二品及申理張華皆  
辭旨明峻爲當時所稱

王濟太原中都人與同郡張楚友善爲本州大中正  
訪問邑人品狀至楚濟曰此人非卿所能目吾自爲  
之乃狀楚曰天才英博亮拔不群

何攀居心平允蒞官整肅愛樂人物敦儒貴才爲梁  
益二州中正引致遺滯巴西陳壽聞又健爲費立皆

西州名士竝被鄉閭所謗清議十餘年攀申明曲直  
咸免冤濫

韓康伯爲吏部尚書初與吳隱之隣居隱之母死康  
伯每聞隱之哭聲必輟飧投杼爲之悲泣謂康伯  
曰若君銓衡當舉此輩人及康伯爲吏部隱之遂階  
清級

宋沈演之爲吏部尚書性好舉才尤濟屈滯  
王僧綽爲吏部郎叅掌大選究諸流品人物拔舉賢  
能咸得其分

南齊張岱爲吏部尚書武帝爲撫軍岱選東陽太守



王績為長史呈選牒太祖笑謂岱曰此素望也

梁張緒仕宋為吏部郎參掌大選後廢帝元徽初更

宮罷選曹擬舍人王儉格外記室緒以儉人地兼美

宜轉祕書丞從之

王瞻為吏部尚書瞻性率亮居選所舉其意多行劉

之遴年十五舉茂才任昉見而異之瞻掌候任昉值

之遴在昉坐昉謂瞻曰此南陽劉之遴學優未仕水

鏡所宜甄擢瞻即調為太學博士

蕭子顯為吏部尚書謝蘭丁父憂毀瘠骨立服闋後

子顯表其至行擢為王府法曹行參

張繡為吏部尚書初繡為吳興太守時陸雲公好學

有才思先製大伯廟碑繡罷郡經途讀集文歎曰今

之蔡伯喈也至都掌選言之於高祖召兼尚書儀曹

郎又王勵為河東王功曹史王出鎮京口勵將隨之

藩繡時典選舉勵造繡言別繡嘉其風采乃曰王生

才地豈可遊於外府乎奏為太子洗馬遷中書舍人

繡居選其後門寒素有一介皆見引拔不為貴要屈

意人上翕然稱之

後魏李冲為吏部尚書典選房景伯少喪父以孝聞

家貧傭書自給養母甚謹尚書盧淵稱之於冲中拔



爲奉朝請司空祭酒

崔休爲吏部郎中遷散騎嘗侍權兼選任休愛才好士多所拔擢

李韶爲吏部尚書時張普惠爲步兵較尉免官故事免官者三載之後降一階而敘若才優擢授不拘此限孝明熙平中韶奏普惠有文有學依才優之例宜特顯敘勅除寧遠將軍司空倉曹叅軍朝議以不降

北齊楊遵彥爲吏部尚書銓衡甚慎選舉秀才擢第  
李德林秀才德

林射策五條考皆爲上授殿中將軍既是西省  
非其所好謝病還都廢帝乾明初彥遵奏追德林入  
議曹

唐張銳爲吏部侍郎高祖謂之曰今年選人之內豈無才用者卿可簡試將來欲縻之好爵於是銳以張行成張知運等數人應命時人以爲知人

高季輔爲吏部尚書韋思謙弱冠舉進士累補應城令及歲滿預選思謙在官頗有公事懲殿舊制多不進官季輔曰自居選部今始得此一人豈以小疵而棄大德特超授監察御史繇是稍知名



李敬玄為司列少嘗伯選人有杭州參軍徐大玄者  
 初在任時同僚有張惠犯賊至死大玄哀其母老乃  
 請獄自陳與吏同受賊惠數既少遂得減死大玄亦  
 坐免官不調十餘年敬玄大嗟賞之擢授鄭州司功  
 參軍太玄繇是知名後官至秘書少監以德行為時  
 所重者以為敬玄能舉善也  
一云敬玄為吏部侍郎  
 咸亨二年有楊炤王勃

盧炤鄰駱賓王並以文章見稱敬玄咸為延譽

裴行儉咸亨初為吏部侍郎典選十餘年甚有能名  
 自掌選及為大總管凡遇賢俊無不甄採

鄭杲則天聖曆中為吏部郎注韓思復為太嘗博士  
 元希聲為京兆士曹嘗謂人曰今年掌選得韓元二  
 子則吏部不負朝廷矣

王丘玄宗開元中為吏部侍郎拔擢山陰尉孫述桃  
 林尉張鏡微湖城丞張晉明進士王冷然李昂等不  
 數年登禮闈掌綸誥焉

崔琳為吏部侍郎判銓日收選人盧怡裴敦復于孺  
 卿等十數人無何皆入臺省

衛次公為吏部侍郎選人有李績者徐有功之孫名  
 在黜中次公召而問之日子之祖先勲在王府豈限  
 常格竝優秩而遣之



册府元龜

淮南李嗣京叅閱

西極文翔鳳訂正

豫章黃國琦較釋

銓選部十

不稱 謬濫 貪賄

不稱

天官之職銓管是司稽周禮理典之制舉魏氏官人之法必資公方之器藻鑒之能所以總百官而式九流也乃有性質凝滯才識駑下不能執守與時浮沉



多所讓私徇於情託無裁斷之用失品藻之方以高簡而自矜惟酣醉以爲適繇是輪轅失序衡鑑不明興非據之譏負敗官之咎豈獨貽其身禍亦乃紊於國經布於簡書可以爲恥

魏時苗鉅鹿人爲大官令領其郡中正定九品至於敘人才不能寬天然紀人之短雖在久遠蓄之不置晉王戎爲吏部尚書以晉室方亂慕遽伯玉之爲人與時舒卷無蹇諤之節自經典選未嘗進寒素退虛名但與時浮沉而已

畢卓爲吏部郎嘗飲酒廢職

梁王亮仕齊爲吏部尚書建武末尚書右僕射江祐嘗朝政多所進拔爲士子肆亮自以身居選部每持異議始亮未爲吏部郎時以祐齊明帝之內弟故深友祐祐爲之廷譽益爲帝所器重至是與祐昵之如初及祐遇誅羣小放命凡所除拜悉繇內寵亮更弗能止外若詳審內無明鑒其所選用示資次而已當世不謂爲能

任昉爲吏部郎中叅掌大選君職不稱尋轉御史中

丞

蕭子顯爲吏部尚書性凝簡負才氣見九流賓客不



與交言但舉扇一揮而已衣冠竊恨之

陳到字仲舉為左僕射叅掌選事仲舉既無學術朝章非所長選舉引用皆出自表樞性疎簡不涉世務與朝市無所親狎但聚財酣飲而已

後魏任城王澄為吏部尚書孝文曰王者不降佐於蒼昊皆拔才而用之朕失於舉人任許一羣婦人革竒事當更銓簡耳任城在省為舉天下綱維為當署事而已澄曰臣實署事而已孝文曰如此便令吏足矣何待任城

李神雋為吏部尚書意尚風流情在推引人物而不能守正奉公無多聲譽有鉅鹿人李炎上書言神雋之失天柱將軍爾朱榮曾聞補人為曲陽縣令神雋以階懸不用榮聞大怒謂神雋自樹親黨排抑勳人神雋懼啓求解官

宋弁為黃門郎司徒左長史時大選內外羣官弁定四海士族弁專叅銓量之任事多稱旨然好言人之陰短高門大族意所不便者弁因毀之至於舊族倫滯人非可忘者又申達之又為本州大中正姓族多所降抑頗為時人所非

東魏龔嘗山王疑孝靜時為尚書令攝選部疑雖居



重任隨時而已

北齊赫連子悅為都官尚書以本官兼吏部子悅在官惟以清勤自守既無學術又闕風儀人倫清鑿去之彌遠一旦居銓衡之首大招物議繇是除太嘗卿卒

袁韋脩為吏部尚書初馮子琮以僕射攝選婚嫁相尋韋脩嘗非笑之語人云馮公營婚日不暇給及自居選曹亦不免時論蓋地勢使然

寇猛為武衛將軍自以上谷寇氏得補燕州大中正而不能甄別士庶也

隋盧愷為禮部尚書權吏部尚書時預選者甚多愷卽授官皆作色而遣之

唐溫彥博太宗時為吏部郎中知選事意在沙汰多所擯抑而退者不伏器訟盈庭彥博雖騁辭辯與之相詰終日喧擾為識者所嗤

戴胄為民部尚書兼簡校吏部尚書及在銓衡抑文雅而獎法吏不適輪轅之用

楊纂為吏部侍郎抑文雅進黠吏觀時任數為時論所譏

唐皎為吏部侍郎嘗引人銓闈何方便穩或云其家



在蜀乃注與吳復有云親老先任江南卽唱之隴右  
論者莫能測其意

楊師道爲吏部尚書師道貴公之子四海人物未能  
委練所署用多非其才而深抑勢貴及其親黨將以  
避嫌然亦無藻鑑之譽從征高麗及師還人有言其  
非典選之才乃轉工部尚書師道乞爲太嘗卿從之  
楊思玄高宗時爲司列少嘗伯特外戚貴待選流多  
不以禮而排斥之爲選者夏侯彪所訟而御史中丞  
郎餘慶彈奏免官

魏克已爲吏部侍郎銓路喧譁大爲冬集人援引指  
擿貶爲太子中允

鄧玄挺爲吏部侍郎旣不稱職甚爲時談所鄙又時  
患消渴病選人因目爲鄧渴作鄧渴詩榜衢路自有  
唐已來掌選之失未有如玄挺者坐此左遷澧州刺  
史遷晉州刺史召拜麟臺少監重爲天官侍郎其失  
有甚於前

韋待賈爲吏部尚書素無才術志識凡下出自武官  
而驟居選部凡所銓綜多爲朝野所嗤鄙

許子儒爲吏部侍郎性無藻鑑所視銓綜皆委令史  
緘直謂曰汝乎配也



後唐崔貽孫爲吏部侍郎性好干人喜得小惠天官  
任重昏耄罔知瞖日將瞑猶以所欲託於選人銓管  
難虛遂除禮部尚書致仕

謬濫

論材定官存於周制興廉舉孝著於漢典得人  
有進律之褒濫進有絀爵之罰故天下慎法莫敢  
謬舉魏晉以降其道駁喪條教所頒旣殊於古銓  
選所屬復罕其人靡能平心守正量才揆職繇是  
用捨徇意詞辯飾非或觀時而任數或爲朋而受  
昧俾夫補授夫次資格差謬多所抑損或成紛訴  
至有附會權勢親狎姦民上不能資朝廷之聰明  
下則積山林之怨憤是使古道不復來者喟然

漢王勳成帝時襲封印城侯坐選舉不以實免

魏何晏爲尚書主選舉其宿與之有舊者多被拔擢  
梁王亮爲吏部尚書拘資次而已當代謂爲不能

後魏李韶爲吏部尚書在選曹不能平心守正通容  
而已議者貶之

崔亮爲吏部尚書時羽林軍新害張彝之後靈太后  
令武官得依資入選官員旣少應選者多前尚書李  
韶循嘗擢人百姓大爲嗟怨亮乃奏爲格制不問士



之賢愚專以停解日月爲斷雖復官須此人停日後者終於不得庸才下品年月久者灼然先用沉滯者皆稱其能亮外甥司空諮議劉景安書規亮曰殷周以鄉塾貢士兩漢繇州郡薦才魏晉因循又置中正諦觀在昔莫不審舉雖未盡美足應十收六七而朝廷貢秀才止求其文不取其理察孝廉惟論章句不及治道立中正不考人才行業空辨氏姓高下至於取士之途不溥沙汰之理未精而舅屬當銓衡宜須改張易調如之何反爲停年格以限之天下士子誰復脩厲名行哉亮答書曰汝所言乃有深致吾秉時饒侍得爲吏部尚書當其壯也尚不如人况今朽老而居帝難之任嘗思用賢舉直以報明主之恩盡忠竭力不爲貽後之累昨爲此格有繇而然今已爲汝所恠千載之後誰知我哉可靜念吾言當爲汝論之吾兼正六爲吏部郎三爲尚書銓衡所宜頗知之矣但古今不同時宜須異何者昔有中正品其才第上之尚書尚書據狀量人授職此乃與天下羣賢共爵人也吾謂當爾之時無遺才無濫舉矣而汝猶六十收六七况今日之選專歸尚書以一人之鑒炤察天下劉毅所云一吏部郎中而欲究竟人物何異以管



闕天而求其博哉今勲人甚多又羽林入選武夫崛起不解書詩唯可曠弩前驅指蹤捕噬而已忽令垂組軒求其烹鮮之効未曾操刀而使剗割又武人至多官員至少不可用博設令十人共一官猶無官可授况一人望一官可繇可不怨哉吾近面執不宜使武人入選請賜其爵厚共祿既不見從是以權立此格限以停年耳昔子產鑄刑書以救弊叔向譏之以正法向異汝以古禮難權宜哉仲尼云德我者春秋罪我者亦春秋吾之此指其繇是也但令當來君子知吾意焉後甄琛元脩義城陽王徽相繼為吏部尚書利其便已踵而行之自是賢愚同貫涇渭無別魏之失人從亮始也

楊愔超拜吏部尚書典選二十餘年獎擢人倫以為已任然取士多以言貌時致謗言以為愔之用人似貧士市瓜取其大者愔聞不以屑意

馮子琮為右僕射物攝選子琮微有識鑒及位望轉隆宿心頓改羅引非類以為深交縱其子弟官位不依倫次又專營婚媾歷選上門例以官爵許之旬日便驗

許子儒則天時為天官侍郎不以藻鏡為意有令使



句直是其腹心每注官多委令下筆子儒但高枕而  
臥語勾直云平配絲是補授失次無復綱紀道路喧

然以為口實是時則天臨朝引見風俗使舉人無賢  
愚咸加擢用高者試鳳閣舍人給事中

次或試員外郎侍御史補闕拾遺較書郎故時人為  
之謗曰補闕連車載拾遺平斗量杷椎侍御史曉曉

較書郎試官  
之起自茲始

宋選玄宗時與苗晉卿俱為吏部侍郎天寶二年選

遙為武當郡太守晉卿為安康郡太守是時海內晏

平選人萬計委有司考覈書判詔重其事兼命他司

考之務求其實遙與晉卿苟媚朝廷又無廉潔之操

取舍淪濫甚為當時所醜有張奭者御史中丞倚之

子不辯菽麥假手為判時升甲科會下第者嘗為蘓

令以其事白于范陽節度使安祿山祿山恩寵崇盛

謁請無時因具奏之帝乃大集登科人御花萼樓親

試升第者十無一二焉奭手持試紙竟日不下一字

時謂之曳白帝大怒遙晉卿既受責乃貶倚為淮陽

郡太守詔曰庭闈之間不能訓子選調之際乃以託

人時士子皆以為戲笑或託於詩賦諷刺考判官禮

部郎中裴肫起居舍人張烜監察御史宋昱左拾遺

孟朝皆貶官嶺外

韋陟天寶中為吏部侍郎陟風神高遠以門地自負



時以選賢拔能爲已任博采浮薄不徇於行屢以此  
失人出爲襄陽太守

楊國忠天寶中以便僻取宰相欲其能事皆出於已  
猶兼吏部尚書故事吏部置三銓尚書侍郎分掌選  
事三注三唱自春及夏纔終其事國忠使猾吏於私  
第暗定官員集百僚於尚書省對注唱一日令畢以  
誇神速資格差謬無復倫序乃令其所昵京兆尹鮮  
于仲通中書舍人竇華侍御史鄭昂之徵賂於選人  
於尚書省門立碑以頌已之德

崔渙肅宗至德初爲黃門侍郎平章事時未復京師  
舉選路絕詔渙充江淮選補使以收遺逸渙選士或  
於聽受又爲下吏所鬻濫進者非一以不稱職聞乃  
知政事爲王傳

浩代宗朝爲吏部侍郎坐以妄第冒選俾侍郎辭  
授京尉爲御史大夫李栖筠所彈奏坐貶明州  
別

令  
八曆中爲刑部員外判吏部南曹時劉晏爲  
尚書  
爲侍郎岷以晏舉分闕必擇其善者與晏  
而以西  
興炎

劉滋爲  
尚書德宗貞元九年御史中丞韋貞伯



劾奏吏部貞 七年冬以京兆府踰濫解選已授官  
摠六十六人或不到京銓試懸受官告又按選格  
銓狀選人自書試日書跡不同卽駁放殿選違格文  
者不復驗及降資不盡或與注官伏以承前選曹乖  
謬未有如此遂使衣冠以貧乏待闕奸濫以賄賂成  
名非陛下求才審官之意繇是滋以前任吏部尚書  
及吏部侍郎杜黃裳皆削一階

陳歸貞元中爲考功員外郎克嶺南選補使選人流  
放注官美惡違背令文唯意出入復供求無厭郵傳  
患之監察御史韓泰奏劾其罪配流恩州

及賣鑿空僞官人許稜等共取受錢都一萬六千七  
百四十貫文又據李賓等款稱去年三月已後商量  
斂錢三千貫文與吏部員外郎楊虞卿廳典溫亮囑  
求楊虞卿不舉勘濫官事得楊虞卿狀虞卿跡忝郎  
署爲明天子舉僞捕奸幸無差謬今李賓之輩結黨  
構虛而云商量斂率甚明用此致尤誰則無罪據李  
賓款本與溫亮錢物囑求虞卿不舉踰濫官者若虞  
卿遂不舉勘則小吏卜射計行今虞卿簡舉僞官牒  
臺推勘於公事足以自明緣溫亮在宅外居住於李  
賓處取受虞卿無繇得知簡下不明伏候嚴責勅李



竇等八人竝僞造印符構賣巨蠹推窮盡法伏斷死刑宜付京兆府各決痛杖一頓處死馬羽卿等一十  
二人引致梯媒合成奸計各決六十配流嶺外楊虞  
卿勾舉雖則盡心簡下終是無術親吏逃逸賊狀未  
明量罰兩月俸料踰濫官六十五人內已付所司者  
速令詳斷見勘具申奏其臧及僞印等竝付所司准  
法處分

後唐明宗長興元年七月吏部南曹奏磨勘南郊行  
事官前守濮州范縣主簿李範是同光元年不納告  
身人數准勅終身不齒今又冒名於四方館行事前

權德輿貞元中爲吏部侍郎吏誤用官闕攻守太子  
賓客

鄭綱文宗時爲吏部尚書丁公著爲工部侍郎知選  
事太和二年閏三月己亥都省奏落下吏部三銓甲  
內今春注超資官凡六十七人勅都省所執是格銓  
司所引是例互相陳列頗以紛紜所貴清而能通亦  
猶議事以制今選期已過方此爭論選人可哀難更  
停滯其三銓已授官都省落下竝依舊注與重團奏  
仍限五日內畢其中如官超一資半資比格令已令  
據稍優者至後選日量事降折尚書侍郎注擬不一



致令都省以此興詞鄭綱丁公著各罰一季俸東銓所落人數較少楊嗣復罰兩月俸其今年選格仍分明標出近例有可行者收入格不可者於格內書破則所司有文可守選人無路僥求時尚書左丞韋弘景以吏部注擬不公選多超資授官糾按其事落下勅申吏部引例以爲據選人輩又惜官已成道路沸騰日接宰相喧訴遂降此勅

楊虞卿爲吏部員外郎太和二年十二月御史臺奏准勅推勘踰濫官都六十五人應取受錢物僞出告身籤符賣鑿空僞官令赴任南曹令史李賓等六人

河南府長水縣主簿趙知遠使兄爲父蔭行事者勅旨李範已該恩赦特放罪叔納文書趙知遠以兄爲父未之前聞旣遇郊禋特從恩宥出身歷任文書付所司焚毀放罪勒歸鄉貫本道長吏與改昭稷奏聞

貪賄

彌綸治典銓綜多士周官冢宰之職也若乃端已以居位潔身以率下旌別淑慝澄汰流品使朝有多士國無幸人斯可謂官修其方矣若乃名浮於實言不顧行黷貨以自穢瘵官而靡懼冒黜幽之典貽敗類之咎歷代而下實繁有徒論而次之用戒於後



宋庾炳之字仲文爲吏部尚書領選既不緝衆論又頗通貨賄用少府卿劉道錫爲廣州刺史道錫至鎮餉白檀牽車炳之性好潔嘗自乘焉或以白文帝帝見問曰道錫餉卿小車裝飾甚麗有之乎炳之懼起謝

梁劉孝綽爲吏部郎在職頗通賊貨爲從弟尚書左丞覽所劾奏免官

何敬容爲左僕射叅掌大選通苞苴餉餽無賄則畧不交語

後魏李宣茂孝文時爲司空府司馬兼定州大中正坐受郡中鄉人財貨爲御史所劾除名爲民

楊尼爲國子祭酒兼幽州中正後除平北府長史帶漁陽太守未拜坐爲中正時受鄉人貨免官

元暉常山王遵之孫宣武時爲吏部尚書納貨用官皆有定價大郡二千疋次郡一千疋下郡五百疋其餘授職各有差天下號曰市曹

皇甫瑒孝明時爲吏部郎性貪婪多所受納鬻賣官吏皆有定價

元修義汝陰王天錫之子爲吏部尚書在銓衡唯事貨賄授官大小皆有定價時中散大夫高居者有旨



先敘上黨郡缺居遂求之修義私已許人抑居不與  
居大言不遜修義命左右牽曳之居對大眾呼天鳴  
賊人問居曰白日公庭安得有賊居指修義曰此座  
上者違天子明詔物多者得官京師白劫此非大賊  
乎修義失色居行罵而出後欲邀車駕論修義罪狀  
左僕射蕭寶寅諭之乃止

元世雋任城王澄之孫出帝時爲吏部尚書居選曹  
不能厲心多所受納爲中尉所彈坐免官

北齊段孝言爲吏部尚書旣無深鑿又待物不平抽  
擢之徒非賄則舊

馮子琮後主時爲吏部尚書其妻胡太后妹也恃親  
放縱請謁公行賄貨填積守宰除授先定錢帛多少  
然後奏聞其所通致事無不允子琮亦不禁制

唐鄭元毓高祖時爲選部郎中以賊犯處極刑  
李義府高宗時爲司列太常伯本無藻鏡才怙武后  
之勢專以賣官爲事補授失次人多怨言

李元恭中宗時以大理少卿爲長寧安樂二公主所  
引用令知吏部侍郎分往東都掌選事亦以賤汙聞  
於天下故時人爲之語曰長寧安樂竝狂顛旣教翻  
地亦翻天覆弄大家猶未足便使元恭來取錢



鄭愔諂事武三思及韋氏悖逆庶人歷選吏部侍郎  
愔掌選專以賣官爲務人多怨讟時京師大旱爲之  
語曰殺鄭愔天必陰其爲人所惡如此

崔湜爲中書舍人與鄭愔同掌選賣官鬻獄一時  
蠹並爲御史所彈中宗勅所司以理勘問勿加窮迫  
繇是希旨無所發明然猶斷愔配流嶺南湜貶江州  
司馬而更授湜襄州刺史愔江州司馬

李彭年玄宗時爲吏部侍郎坐贓伏罪詔曰彭年幸  
以資序累登清貫委之銓綜任以權衡不能徇公滅  
私持平守直而乃貪財敗類黷貨無厭旣玷清朝有

冒法度頃令推鞠皆自茲承據其罪名合當殊死但  
以陽和布令善貸好生特舍嚴刑俾從流竄宜除名  
長流嶺南臨賀郡仍卽差綱馳驛領送朕以爲制理  
之本期返淳風庶叶至公期於不犯永言議罪良用  
慙然豈陳力就列本於正已從事劾官義存守法爲  
惡者與衆共棄務善者以才必升凡百庶僚深宜自  
勉立身之道可不慎歟彭年先朝宰臣慎遠之孫也  
以吏才知名掌選七年好聚財無廉潔之操而善接  
待選人惟黷貨無厭人多怨之至是睢陽太守路齊  
暉之子曰畿納絹千疋求官爲選人所發詔下有司



許鞠彭年引紙稱伏賊狀狼籍遠近恥之咸以為戒  
陳歸德宗時為考功員外郎充嶺南選補使選人流  
放注官美惡違背令文以意出入復供求無厭郵傳  
患之監察御史韓泰奏劾得罪配流恩州

冊府元龜

李嗣京參閱

文翔鳳訂正

黃國琦較釋

貢舉部

總序

三代貢舉之制始于卿大夫其升于司徒曰秀士升  
于太學曰俊士升于司馬曰進士然則卿大夫暨于  
司馬皆貢舉之官也秦之制無聞焉漢高祖始詔御  
史中執法下郡守勸勉賢者詣相國府署行義年文



帝詔諸侯王公卿郡守舉賢項能直言極諫者元帝  
又詔丞相御史舉質樸敦厚遜讓有行又詔列侯舉  
茂才又舊儀刺史二千石察舉茂才尤異此則漢之  
諸侯王丞相御史九卿列侯刺史郡守皆有舉士之  
制而丞相之府實司其事武帝令太嘗籍博士弟子  
有秀才異等輒以名聞又光祿勳銓第郎吏歲舉秀  
才廉吏此則太嘗光祿勳別有舉士之制也至成帝  
初置尚書嘗侍曹王公卿又置二千石曹掌郡國二  
千石則尚書主選舉之始也後漢三公將軍光祿勳  
廷尉司農中二千石司隸州牧歲舉茂才廉吏郡國

歲舉孝廉三公上尚書輒舉其舉將又大學試明經  
弟子此與西漢之制畧同其後改嘗侍曹為吏曹亦  
曰選部又公府西曹主府吏置用東曹主二千石長  
吏選除于時選舉之制於郡國屬功曹於公府屬東  
西曹於尚書屬吏部而尚書令僕總之魏司空陳羣  
以為天臺選用不悉人才每郡擇有鑒炤者除為中  
正目狀人才澄汰九品又置州都總其事應璩所謂  
百郡立中正九州置都士又吳亦有大公平若魏之  
州都而蜀無聞焉晉宣帝除九品州置大中正大中  
正之職掌訪問鄉邑考績德行以定上格下格選平



正無禮力貶清議晉令大小中正爲內官聽月二會  
議上東門外州及郡國亦舉孝廉秀才其在天臺則  
吏部州則別駕西曹郡國則功曹主其事宋齊亦如  
之而宋文帝不欲重權在下故分置二吏部尚書以  
散其權梁無中正天監中州置州望郡置郡宗鄉置  
鄉豪各一人專典搜薦無復膏梁寒素之隔普通七  
年又詔州郡歲舉人敬帝復令諸州各置中正選舉  
皆中正押上然後量試不然則否陳亦如之後魏州  
郡皆有中正掌選舉每以季月與吏部銓擇可否其  
秀才對策居中上表敘之崔浩爲冀州大中正薦冀

定釋幽并五州士數十人各起家爲郡守自太和以  
前精選中正德高鄉國者充之其邊州小郡人物單  
賤者則併附佗州其在僻陋則闕而不置當時稱爲  
簡當頗曰得人及宣武孝明之時州無大小必置中  
正旣不可悉得其人故有蕃落庸鄙操銓覈之權而  
選敘頽紊正始初乃罷諸郡中正而吏部之職皆如  
往制北齊選舉亦沿後魏凡州縣皆置中正中書策  
秀才集書策貢士考功策廉良天子嘗服乘輿坐朝  
堂中楹秀孝各以班草對字有脫誤者呼起立席後  
事有濫劣者飲墨水一升文理益浪者奪席脫容刀



孝昭帝孝建二年詔內外執事官每三年之內各舉一人居白屋巾褐未釋亦舉之後周初蘇綽爲六條詔書其四曰擢賢良懲魏齊之失罷門資之制其所察舉頗加精慎武帝平齊詔山東縣舉明經幹理宣帝亦詔州舉高才博學者爲秀才郡舉經明行修者爲孝廉依六官之制建吏部中大夫掌選舉小吏部下大夫一人以貳之隋開皇七年制諸州歲貢士十八年又詔京官五品已上總管刺史以主行修謹清平幹濟二科舉人皆吏部主之初漢魏之郡佐史皆刺史二千石辟署北齊多繇中用故州郡辟士之權

移於朝廷後周復遵古制及隋皆歸吏部故朝廷貢舉之制盛矣唐循隋制諸郡貢士嘗貢之科有秀才有明經有進士有明法有明書有明筭自京師崇文館國子監郡縣皆有學焉每歲仲冬國子郡縣課試其成者長吏會屬僚設賓主陳俎豆備管弦牲用少牢行鄉飲酒歌鹿鳴之詩徵耆艾敘少長而觀焉就餞而與計偕其不在學而舉者謂之鄉貢至尙書省始繇戶部集閱而關於考功課試可者爲第武德舊制以考功郎中監試貢舉貞觀已後則考功員外郎專掌之武后載初元年策問貢舉人于雒城殿前試



貢舉人自此而始長安二年又教人習武藝每歲如明經進士之法行鄉飲酒之禮送于兵部明皇開元二十四年制令禮部侍郎專掌貢舉初因考功員外李昂詆訶進士李權文章大爲權所凌訐朝議以郎官地輕故移於禮部又詔應試進士等唱第訖具所試送中書門下詳覆是年始置禮部貢舉卽其後禮部侍郎闕人亦以佗官主之謂之權知貢舉其知貢舉者皆朝廷美選二十九年京師又置宗玄館諸州置道學生有差道學生謂之道舉課試與明經同先是掌貢舉官親族皆於禮部差卽官考試有及第者

尚書覆定及第者仍別奏謂之奏移送吏部令考功員外試練侍郎覆定及第者仍別奏謂之別頭舉人代宗永泰元年始置兩都貢舉禮部侍郎官號皆以兩都爲名每歲兩地別所及第至大曆十一年停東都貢舉德宗貞觀十六年又罷別頭舉人文宗太和元年又權於東都置貢舉又有制詔舉人皆標其目而搜揚知之志烈秋霜詞殫文律抱器懷能茂才異等才膺管樂道侔伊召賢良方正軍謀宏遠明於體用達於吏理之類始於顯慶盛於開元貞元皆試於殿廷乘輿親臨觀之試已糊其名於中考之策高者



特授美官其次與出身又有吏部科目曰宏詞拔萃  
平判官皆吏部主之又有三禮三傳三史五經九經  
開元禮等科有官階出身者吏部主之白身者禮部  
主之其吏部科目禮部貢舉皆各有考官大抵銓選  
屬吏部貢舉屬禮部崇文館生屬門下省國子學生  
屬國子監州府鄉貢屬長官職司在功曹司功五代  
因之夫以賢爲寶得士者昌聖賢之談邦國之制也  
貢舉之設王政攸先方冊所傳舊章不墜或有公直  
以馳譽精識以知名不徇乎朋家咸求乎藝實故能  
若水鑒之儼衡石之平增臺閣之輝副文儒之望亦

有時於遠體拘乎小節或鄭雅而靡辨或涇渭而其  
流以公器而徇私恩採虛聲而損至學俾白駒以興  
刺使嘉魚而絕詠斯爲蠹政良足憤惋今乃紀善惡  
之迹著得失之效用爲勸沮以示方來凡貢舉部七  
門

### 條制第一

夫鄉舉里選辨論官材蓋成虞之制也所以治烝髦  
之詠成思皇之美藹藹而多言士焉及諸侯力政家  
邦異俗斂才之道闐而無聞漢室龍興首議聘士其  
後增設科目詳延英彥至乃限郡國以所舉之數威



守相以蔽賢之罰馳單車以博訪詔有位以薦能計  
階續食既優其待遇署職補吏復著於品式課試之  
典亦增損之有殊年族之制固因革之斯異稽於前  
志咸用論次以爲貢籍故事云

周官大司徒職教萬民而賓興之一曰六德二曰六  
行三曰六藝詩書禮樂謂之四術四術既修九年大  
成凡士之有善鄉先論士之秀者升諸司徒曰選士  
司徒論選士之秀者而升諸學曰俊士既升而不征  
者曰造士大樂正論造士之秀升諸司馬曰進士司  
馬論進士之賢者及鄉老郡吏以賢能之書皆獻於

王登於天府藏於祖廟內史書其二而行焉

書其二謂寫其

本副在其職也則鄉老卿大夫舉賢能而賓其禮司徒  
教三物而興諸學司馬辨官材以定其論太宰詔廢  
置而持其柄內史贊予奪而二於中司士掌其版而  
知其數論定然後官之任定然後爵之位定然後祿  
之蓋擇材取士如此之詳也

漢高帝十一年二月下詔曰賢士大夫既與我定有  
天下而不與吾共安利之可乎有肯從我遊者吾能  
尊顯之以布告天下中執法下郡守其有稱意  
明德者必身勸爲之駕有賢者郡守身自往勸遣前  
勉令至京師駕車遣之



相國府署行義年

行義年紀也

有而弗言覺免年老癯病

勿造

惠帝四年正月詔舉人孝悌力田者復其身

武帝建元元年十月詔天下舉賢良方正直言極諫

之士其理申商韓非蘇秦張儀之言亂國政皆罷之

申商韓非刑名之學蘇張縱橫之說竝不用也

元光元年十一月舉賢良董仲舒對策請令諸侯列

卿郡守二千石各擇其吏人之賢者歲貢各二人以

給宿衛且以觀大臣之能所貢賢者有賞不肖者有

罰夫如是諸侯吏二千石皆盡心於求賢天下之士

可得而官使也

授之以官以使其材也

無以日月為功實試賢

能為上量材而授官錄德而定位

錄謂存錄也

則廉恥殊

路賢不肖異處矣帝因是令郡國舉孝廉各一人

孝者

善事父母者也廉謂清潔有廉隅者也

五年詔徵吏民有明當代之務習先聖之術者縣次

續食令與計偕

計者上計簿使也郡國每歲遣詣京師上之偕者俱也令所徵之人與上

計者俱來而縣次給之食也

元朔元年十一月詔曰公卿大夫所使總方畧一統

類廣教化美風俗也夫本仁祖義褒德錄賢勸善刑

暴五帝三王所繇昌也朕夙興夜寐嘉與宇內之士



臻於斯路故旅耆老

加惠於耆老之人若賓旅也

復孝敬選家俊

講文學稽叅政事祈進民心深詔執事興廉舉孝庶

幾成風紹休聖緒夫十室之邑必有忠信三人並行

厥有我師今或至闔郡而不薦一人是化不下究而

積行君子壅於上聞也二千石官長紀綱人倫將何

以佐朕燭幽隱勸元元厲蒸庶崇鄉黨之訓哉且進

賢受上賞蔽賢蒙顯戮古之道也其與中二千石禮

官博士議不舉者罪有司奏議曰古者諸侯貢十一

適謂之好德再適謂之賢賢或適謂之有功乃加九

錫不貢士一則黜爵再則黜地三而黜爵地畢矣夫

附下罔上者死附上罔下者刑與聞國政而無益於

民者斥在上位而不能進賢者退此所以勸善黜惡

也今詔書昭先帝聖緒令二千石舉孝廉所以化元

元移風易俗也不舉孝不奉詔當以不敬論不察廉

不勝任也當免奏可

凡郡國之官非傅相其他既自置置又調屬僚及部人賢皆舉

為秀才兼吏而貢於王庭多拜為郎居三署無嘗員或至千人屬光祿勳故鄉較牧守若閑待詔或郡國

貢選公車徵起悉在焉光祿勳復於三署中銓第即吏歲舉秀才廉吏出為佗官以補缺員

五年六月公孫弘以儒術為丞相天下之學士靡然

向風時太嘗孔臧等議曰請為博士官置弟子五十

人復其身太嘗釋民年十八以上儀狀端正者補博



士弟子郡國縣道邑有好文學敬長上肅政教順鄉里出入不悖所聞令相長丞上屬所二千石謹察可者與計偕詣太嘗得受業如弟子一歲皆課能通一藝以上補文學掌故缺其高第可以為郎中太嘗奏即有秀才異等輒以名聞其不事學若下材及不能通一藝罷之而請諸能稱焉

孝昭始元初遣故廷尉三平等五人

前為此官今不若官皆謂之故

持節行郡國舉賢良

後漢光武十二年詔三公舉茂才各一人監御史司

隸州收歲舉茂才各一人

章帝建初元年詔曰夫鄉舉里選必累功勞今刺史

守相不明真偽茂才孝廉歲以百數

漢曰秀才後漢避光武諱故曰

茂才魏復曰秀才既非能者而當授之政事甚無謂也每尋

前代舉人貢士或起猷畷不繫闕閱數奏以言則文

章可採明試以功則理有異迹文質彬彬朕甚嘉之

始復用前漢丞相故事以四科辟士

武帝因董仲舒之言立制故事

在丞相府今復用之第一科補西曹南閣祭酒二科補儀曹三科補四辟八表四科補賊曹

凡所

舉士先試之以職乃得充選其德行尤異不宜試職

者疏於佗狀舉非其人兼不舉者罪

和帝時大郡口五六十萬舉孝廉二人小郡二十萬



并有蠻夷者亦舉二人帝以為不均下公卿會議司徒丁鴻司空劉方上言凡口率之科宜有借品蠻夷雜錯不得為數自今郡國率二十萬口歲舉孝廉一人四十萬二人六十萬三人八十萬四人百萬五人百二十萬六人不滿二十萬二歲一人不滿十萬三歲一人帝從之又制緣邊郡口十萬以上歲舉孝廉一人不滿十萬二歲舉一人五萬以下三歲一人永元十四年司空徐防上疏曰臣以為博士及甲乙試策宜從其家章句開五十難以試之解釋多者為上第引文明者為高說若不依先師義有相伐

伐謂自相

也皆正以為非五經各取上第六人論語不宜射

策雖所失或以差可矯革

東觀記防上疏曰試論語本文章句粗通度物以射

策真令學者務本有所一心專精師門思核經意事得其實道得其真於此弘廣經術尊崇聖業有益於化雖從來又大經衰微學問詔書下公卿皆從防言

安帝永初二年九月詔居鄉里有廉清孝順之稱才

任理人者國相歲移名與計幣上尚書公府通調令

得外補

順帝永建六年七月以太學新成試明經下第者補

弟子增甲乙科員各十人除郡國耆滿九十人補舍

人



九月初令郡國舉孝廉限年四十以上諸生通章句  
文史能賤奏乃得應選其有茂才異行若顏淵子奇  
不拘年齒時尚書左雄上言郡國孝廉古之貢士則  
宰民宣協風教若有面牆則無所施用孔子曰四十  
不惑禮稱強仕請自今孝廉年不滿四十不得察舉  
皆先詣公府諸生試家法文吏課賤奏副之端門練  
其虛實以觀異能以美風俗有不承科令者正其罪  
法若有茂才異行若顏淵子奇自可不拘年齒帝從  
之於是班下郡國又云尚書僕射胡廣以雄議改察  
舉之制限年四十以上儒者試經  
學文吏試章奏與尚書史敞郭虔奏駁曰選舉因才  
無拘定制漢承周秦兼覽殷夏祖德師經參雜伯軌

聖王賢臣世以制理貢舉之制莫或因革今以一  
之言刻奏舊章利便未明衆心莫厭愚以為可宜下  
百官參其同異帝不從尚書令黃瓊又以雄所上孝廉之選專  
用儒學文吏於取士之義猶有所遺乃奏增孝弟及  
能從政者為四科事竟施行

桓帝建和元年詔諸學生年十六以上比郡國明經  
試次第上名高第十五人上第十六人為郎中中第  
十七名為太子舍人下第十七人為王家郎

永壽二年詔復課試諸生補郎舍人其後復制學生  
滿二歲試通二經者補文學掌故其不能通二經者  
須後試復隨輩試試通一經者亦得為文學掌故考



浦二歲試能通三經者擢其高第爲太子舍人其不得第者後試復隨輩試第復高者亦得爲太子舍人已爲太子舍人滿二歲能通四經者擢其高第爲郎中其不得第者後試復隨輩試第復高者亦得爲郎中滿二歲試能通五經者擢其高第補吏隨才而用其不得第者後試復高亦得補吏

魏文帝黃初二年正月初令郡國口滿十萬者歲察

孝廉一人其有秀異無拘戶口

三府議舉孝廉本以德行不復限以試經

司徒華歆以爲喪亂以來六籍墜廢當務存立以崇王道夫制法者所以經盛衰今聽孝廉不以經試恐學業遂從此而廢若有秀異可特徵用患於無其人可患不得哉帝從其言又魏郡顏川典農中郎將裴

潛人進貢舉比之郡國

繇是農官進仕路泰

三年正月詔曰今之計考古之貢士也十室之邑必有忠信若限年然後取士是呂尚周晉不顯於前世也其令郡國所選勿拘老幼儒通經術吏達文法到皆試用有司糾正不以實者

明帝太和四年二月詔曰世之質文隨教而變兵亂以來經學廢絕後生進趣不繇典謨豈訓導未洽將進用者不以德顯乎其郎吏學通一經才任牧民博士課試擢其高第者亟一用其浮華不務道本者皆罷退之



晉元帝初制揚州歲舉二人諸州各一人先是以兵  
亂務存慰悅遠方孝秀到不策試普皆除署至是帝  
申明舊制皆令試經有不中舉者制刺史太守免官  
大興三年秀孝多不敢行其有到者竝託疾帝欲除  
署孝廉而秀才如前制尚書郎孔坦奏議曰臣聞經  
邦建國教學爲先移風崇化莫尚斯矣古者且耕且  
學三年而通一經以平康之世猶假漸漬積以日月  
自喪亂以來十有餘年干戈載揚俎豆禮戢家廢講  
誦國闕庠序率爾責試竊以爲疑然宣下以來涉歷  
三載累遇慶會遂未一試揚州諸郡接近京都懼累

其君父多不敢行其遠州邊郡掩誣朝廷冀於不試  
冒昧來赴既到審試遂不敢會臣愚以不會與不行  
其爲闕也同若當徧加除署是爲肅法奉憲者失分  
僥倖投射者得官頽風傷教懼於是始夫王言如絲  
其出如綸臨事改制示短天下人聽有感臣竊惜之  
愚以王命無二憲制宜信去年察舉一皆試策如不  
能試言不拘到遺歸不署又秀才雖以試策亦記問  
經義苟所未學實難開通不足復曲碎乖例違舊造  
異謂因其不會徐更革制可申明前下崇修學較普  
延五年以展講習鈞法齊訓示人軌則夫信之與法



為政之綱施之家室猶弗可二况經國之典而可翫  
黷乎帝納焉聽孝廉申至七年秀才如故

宋制丹陽吳郡會稽吳興四郡歲舉二人餘郡各一  
人凡州秀才郡孝廉至皆策試天子或親臨之及公  
卿所舉皆屬于吏部序才銓用凡舉得失各有賞罰

失者其人宜加禁錮年月多少隨宰議制

晉末諸州郡所遺秀才

才孝廉多非其人高祖作相表天子申明舊制依舊策試

文帝元嘉中限年三十而仕

孝武卽位仕者不復拘老幼

明帝泰始三年都令史駱宰議策秀孝格五問竝得

為上四三為中二為下一不合與第尚書郎謝超宗

議以為片辭折獄十言控衆魯史褒貶孔論興言皆

無俟繁而後秉裁夫表事之淵析理之會豈必委贖

方切治道非患對不盡問患以嘗文弗奇必使一通

峻正寧劣五通而嘗與其俱奇一亦宜採詔從宰議

南齊習宋代限年之制然而鄉舉里選不覈才德其

所進取以官婚曹籍為先遂令甲族以二十登仕後

門以三十試吏故有有增年矯貌以圖進者其時士

人皆厚結姻援奔馳造請浸以成俗

和帝時梁高祖為相上表曰聞中間立格甲族以三



十登任後門以過立試吏求之愚懷抑有未達何者  
設官分職惟才是務若限歲登朝必增年就官故貌  
實幼童籍已踰立滓穢名教於斯爲甚炤依表施行  
梁初無中正制年二十有五方得人仕

天監四年正月詔曰今九流嘗選年未三十不通一  
經不得解褐若有才同甘顏勿限年次

五年正月詔曰在昔周漢取士方國頃代彫訛幽仄  
罕被人孤地絕用隔聽覽士操淪胥因茲靡勸豈其  
嶽瀆縱靈偏有厚薄實繇知與不知用與不用耳朕  
以菲德君此兆民而兼明廣炤屈於當戶飛耳長目

不及四方永言愧懷無忘旦夕此諸郡國舊族邦內  
無在朝位選官搜括使郡有一人

七年二月詔於州郡縣置州望郡宗鄉豪各一人專  
掌搜薦

八年五月詔曰學以從政殷勤往哲祿在其中抑亦  
前事朕思闡治綱每敦儒術輔閣闕造次以之故  
負褒成風甲科間出方當置諸周行飾以青紫其有  
能通一經始末無倦者策貫之後選可量加敘錄雖  
復牛監羊肆寒品後門竝隨才試吏勿有遺隔

陳依梁制凡年未三十不得入仕唯經學生策試得



第諸州迎主簿西曹左奏及嘗爲挽郎得未壯而仕  
諸郡惟正王爲丹陽尹經迎得出身者亦然庶姓尹  
則否有高才異行殊勲別降恩旨敘用者不在嘗例  
後魏孝文延興二年六月詔頃者州郡選貢多不以  
實碩人所以窮處幽仄鄙夫所以超分妄進豈所謂  
旌賢樹德者也近年貢舉尤爲猥濫自今年貢舉所  
遣皆須盡州郡之高才極鄉閭之俊選

太和十五年八月詔諸州舉秀孝先盡才學

宣武詔庶族子弟年未十五不聽入仕

封軌爲考功郎中奏請遣四門博士明經學者簡試  
諸州學生詔從之

孝明熙平元年初聽秀才對策第居中上敘之

莊帝初詔求德行文藝政事強直者縣令郡守刺史  
皆敘其志業且以表聞待三人以上縣令太守刺史  
賞一階舉非其人者黜一階

北齊選舉多沿後魏之制其課試之法中書策秀才  
策書策考貢士考功郎中策廉良天子嘗服乘輿出  
生於朝堂中楹秀孝各以班草對字有脫誤者呼起  
立席後書有濫劣者飲墨水一升文理孟浪者奪席  
脫容刀



後周文帝霸府時蘇綽爲六條詔書其四曰擢賢良  
綽深思本始懲魏齊之失罷門資之制其所察頗加  
精慎

武帝建德六年七月詔山東諸州舉有才者上縣六  
人中縣五人下縣四人赴行在所共論政理得失  
九月詔東土諸州儒生明一經已上竝舉送那郡以  
禮發遣

宣帝宣政元年八月詔制九條宣下郡州其八曰州  
舉高才博學者爲秀才郡舉經明行修者爲孝廉上  
州上郡歲三人下州下郡歲一人

隋文帝開皇七年正月制諸州歲貢三人

十六年六月制工商不得進仕

十八年八月詔京官五品以上及總管刺史竝以志  
行脩謹清平幹濟二科舉人

唐貢士之法多循隋制上郡歲三人中郡二人下郡  
一人有才能者無嘗數其嘗貢之科有秀才有明經  
有進士有明法有書有算自京師郡縣皆有學焉每  
歲仲冬郡縣館監課試其成者長吏會屬僚設賓主  
陳俎豆備管弦性用少牢行鄉飲酒禮歌鹿鳴之詩  
徵耆艾敘少長而觀焉旣餞而與計偕其不在館學



而舉者謂之鄉貢舊令諸郡雖一二三人之限而實無嘗數到尚書省給錄戶部集閱而關於考功課試可者為第初秀才科第最高試方畧策五條有上上中上下中上凡四等貞觀中有舉而不第者坐其州長繇是廢絕自是士族所趨嚮惟明經進士二科而已其初止試策

貞觀八年詔加進士試讀經史一部開元二十四年以後復有秀才

舉其時以進士漸難而秀才本科無貼經及雜文之限反易於進士主司以其科廢久不欲收獎應者多落之三十年來無登第者至天寶初禮部侍郎韋陟始奏請有堪此舉者乃令官長時考其嘗年舉送者

九年五月二十日勅自今已後明經兼習周禮若儀禮者於本色內量減一選

高宗上元二年正月勅明經加試老子策二條進士加試帖三條

儀鳳三年五月勅自今已後道經孝經竝為上經貢舉人竝須兼通其餘經及論語任依嘗式

調露三年四月劉思立除考功員外郎先時進士但試策而已思立以其庸淺奏請帖經及試雜文自後因以為嘗

永隆二年八月詔曰學者立身之本文者經國之資



豈可假以虛名必須徵其實效如聞明經射策不讀正經抄撮義條纔有數卷進士不尋史傳惟誦舊策共相模擬本無實才所司考試之日曾不簡練因循舊例以分數爲限至於不辨章句未涉文者以人數未充皆聽及第其中亦有明經學業該深者惟許通六進士文理華瞻者竟無甲科銓綜藝能遂無優劣試官又加顏面或容假手更相囑請莫憚糾繩繇是僥倖路開文儒漸廢興廉舉孝因此失人簡賢任能無方可致自今已後考功試人明經試帖取十帖得六已上者進士試雜文兩首識文律者然後竝令試

策仍嚴加捉搦必材藝灼然合昇高第者竝卽依令其明法并書算貢舉人亦量准此例卽爲嘗式

永淳二年三月初令應詔舉人竝試策三道卽爲永例

則天載初元年二月十四日試貢舉人于雒城殿前

數日畢

殿前試人自茲始也

長壽二年二月令貢舉人習則天所撰臣軌停通老子道德經

十月左拾遺劉承慶上疏曰伏見比年已來天下諸州所貢物至元日皆陳在御前惟貢人獨於朝堂拜



列但孝廉秀異國之英才既隨方物以充歲貢宜同  
珍幣列見王庭豈得金帛羽毛昇於玉陛之下賢良  
文學棄彼金門之外恐所謂貴財而賤義重物而輕  
人甚不副陛下好道之心尊賢之意伏請貢舉人至  
元日引見列在方物之前以播充庭之禮從之

長安二年正月初令天下諸州有練習武藝者每年  
准明經進士例舉送

中宗神龍二年二月制貢舉人停習臣軌依舊習老  
子

玄宗開元六年二月詔曰我國家敦古質斷浮豔禮  
樂詩書是弘文德綺羅珠翠浮華弊風必使情見於  
詞不用言浮於行比來選人試判舉人對策剖析案  
牘敷陳奏議多不切事宜廣張華飾何大雅之不足  
而小能之是術自今已後不得更然

七年三月詔曰孝經者德教所先自頃已來獨宗鄭  
氏孔氏遺旨今則無聞又子夏易傳近無習者輔嗣  
注者亦甚甄明諸家所傳互有得失獨據一說能無  
短長其令儒官詳定所長令明經者習讀若將理等  
亦可兼行其習易者兼帖子夏易傳共爲一部亦詳  
其可否奏聞



五月太子左庶子劉子玄奏孝經註請廢鄭依孔老子注請停河上公行王輔嗣易傳非子夏所造禮部奏議請准令式孝經鄭註與孔傳依舊俱行子夏易傳無益後學不可將帖正經詔曰朕以全經道喪大義久乖淳感之性浸微流遁之原未息是用旁求廢簡遠及缺文欲使發揮異說同歸善道永惟一致之用以開百行之端間者諸儒所傳頗乖通義敦孔學者異鄭門之息滅尚今文者指古傳爲誣僞豈朝廷竝列書府以廣儒術之心乎况孔鄭大宗固多殊趣諸生會議會無所由而推求小疵其細已甚聚訟之訛人無則焉其何鄭二家可令仍舊行用王孔所註傳習者希宜存繼絕之典頗加獎飾子夏傳逸篇既廣前令帖易者停

八年七月國子司業李元瓘上言三禮三傳及毛詩尚書周易等竝聖賢微旨生徒教業必事資經遠則斯道不墜今明經所習務在出身戒以禮記文少人皆諳讀周禮經邦之軌則儀禮莊敬之楷模公羊穀梁歷代宗習今兩監及州縣以獨學無友四經殆絕既事資訓誘不可因循其學生望請各量配作業并貢人預試之日習周禮儀禮公羊穀梁竝請帖十通



五許其入策以此開勸卽望四海均習九經該備從  
之

十六年十二月二十四日國子祭酒楊瑒奏今之舉  
明經者主司不詳其術作之意每至帖試必取年頭  
年月孤經絕句自今已後考試者盡帖平文以存大  
典又曰今之明經習左氏者十無一二恐左氏之學  
廢又周禮儀禮公羊穀梁亦請量加優獎遂下制明  
經習左氏及通周禮等四經者出身免任散官

十七年三月國子祭酒楊瑒上言曰伏聞承前之例  
每年應舉嘗有千數及第兩監不過一二十人臣恐

三千學徒虛費官廩兩監博士濫靡天祿臣竊見入  
仕諸色出身每歲向二千餘人於明經進士多十  
餘倍自然服勤道業之士不及胥吏以之效官豈識  
先王之禮義陛下設學較務以勸進之有司爲限約  
務以黜退之臣之微誠實所未曉今監司課試十已  
退其八九至及第十又不收一二若長以此爲限恐  
儒風漸墜小道將興若以出身人多應須諸色都減  
豈在獨抑明經進士也帝然之

二十一年御注老子戊詔天下每歲貢士減尚書論  
語策而加老子焉



二十二年三月詔曰博學多才道術醫藥舉人等先  
令所司表薦兼自聞達勅限以滿須加考試博學多  
才舉人限今來四月內集道術醫藥舉人限閏三月  
內集其博學科試明三經兩史已上帖試稍通者多  
才科試經國商畧大策三道并試雜文三道取其詞  
氣高者道術醫藥舉取藝業優長試練有效者宜令  
所錄依節限處分

二十三年十月詔曰文學政事必在考言孝梯力田  
必須審行頃從一槩何謂四科其孝梯力田舉人宜  
各自疏比來事迹爲鄉閭所委者朕當案覆別有處

分

二十四年三月詔曰每歲舉人求士之本專典其事  
寧不重歟頃年以來惟考功郎所職位輕務重名實  
不倫欲盡委長官又銓選猥積且六官之列體骨足  
同况宗伯掌禮宜主賓薦自今已後每歲諸色舉人  
及齋郎等簡試並於禮部集旣衆務煩雜仍委侍郎  
專知

二十五年正月詔曰致理興化必在得賢強識博聞  
可以從政且今之明經進士則古之孝廉秀才近日  
以來殊乖本意進士以聲韻爲學多昧古今明經以



冊府元龜卷之六十一  
條制一  
帖誦爲功罕窮旨趣安得爲敦本復古經明行修以  
此登科非選士取賢之道也其明經自今已後每經  
宜帖十取通五已上免舊試一帖仍案問大義十條  
取通六已上免試經策十條令答時務策三首取粗  
有文性者與及第其進士宜停小經准明經例帖大  
經十帖取通四已上然後准例試雜文及策考通與  
及第其明經中有明五經以上試無不通者進士中  
兼有精通一史能試策十條得六已上者委所司奏  
聽進止其應試進士等唱第訖其所試雜文及策送  
中書門下詳覆其所問明經大義日仍須對同舉人

考試庶能否共知取舍無媿有功者達可不勉與

此詔

因侍郎姚奕奏也

二十六年正月丁丑制曰古者鄉有序黨有塾將以  
弘長儒教誘進學徒化人成俗率繇於是斯道久廢  
朕用憫焉宜令天下州縣每一鄉之內里別各置學  
仍擇師資令其教授其諸州鄉貢明經進士每年引  
見訖更令國子監謁先師所司設食學官等爲之開  
講質問疑義且公侯之緒皆稟義方學禮聞詩不應  
失墜容其傲倖是長慢游如聞比來弘文崇文學生  
緣是貴胄子孫多有不專經業便與及第深謂不然



自今已後宜一依令式試

壬辰詔曰孝悌力田風化之本苟有其實未必求名

比年將同舉人考試詞策便與及第以嘗為科是開

僥倖之門殊乖敦勸之意自今已後不得更然其兼

著狀迹殊尤者委所繇長官時以名薦朕當別有處

分更不須隨考使例申送

二十九年正月於京師置崇玄館諸州置道學生徒

有差

京都各百人諸州無嘗員習老莊文列謂之四子蔭第與國子監同

謂之道舉舉

送課試與明經同凡舉司課試之法帖經者以所習

經掩其兩端中間惟開一行裁紙為帖凡帖三子隨

時增損可否不一或得四得五得六者為通

後舉人積多故

其法益難務欲落之至有帖孤章絕句疑似參互者以惑之甚者或上抵其注下餘一二字使尋之難知謂之例援既甚難矣而舉人則有注聯孤絕索幽隱為詩賦而誦習之不過十數篇則難者悉詳矣其於平文大義或多牆面焉

貢舉部

條制第二

唐天寶元年四月詔曰

德其美至大非聖人孰能章之昔有州李年代與道

我列祖玄元皇帝及後明本設引生靈

冊府元龜

貢舉部



册府元龜

淮南

西極文翔鳳訂正

豫章黃國琦較釋

貢舉部

條制第二

唐天寶元年四月詔曰化之原者曰道道之用者為德其義至大非聖人孰能章之昔有周季年代與道喪我列祖玄元皇帝乃發明妙本汲引生靈遂著玄經五千言用救時弊義高象繫理貫希夷非百氏之



能儔豈六經之所擬承前習業人等以其卷數非多  
列在小經之目微言與旨稱謂殊乖自今已後天下  
應舉除崇玄學生外自餘所試道德經宜並停仍令  
所司更詳擇一小經代之其道經爲上經德經爲下  
經庶乎道尊德貴是崇是奉凡在遐邇知朕意焉

五月中書門下奏兩京及諸郡崇玄學生等准開元  
二十九年正月制前件人合習道德及南華通玄冲  
虛等四經又准天寶元年二月制改庚桑子爲洞靈  
真經在諸條補崇玄學亦合習讀伏准後制合通五  
經其洞靈真經人間少本臣近令諸觀尋訪道士全

無習者本既無廣業實難成并通玄冲虛二經亦恐  
文字不定玄教方闡學者宜精其洞靈等三經望付  
所司各寫十本較定訖付諸道採訪使頒行其貢舉  
司及兩京崇玄學生亦望各付一本今冬崇玄學人  
望且准開元二十九年正月諸條考試其洞靈真經  
請待業成後准式從之

二年三月十六日制崇玄生試及帖冊各減一條三  
年業成始依嘗式

七載五月詔曰道教之設淳化之源必在弘闡以敦  
風俗頃列四經之科將冠九流之首雖及門求進頗



有其人而翻與窮微罕聞達者豈專精難就為勸獎  
未弘天下諸色人中有通明道德經及南華等四經  
任於所在自舉各委長官考試申送其崇玄生出身  
自今以後每至選宜減於嘗例以為留放

十一載七月舉人帖及口試並宜對眾考定便唱通  
否

十二月勅禮部舉人比來試人頗非允當帖經首尾  
不出前後復取者也之乎頗相類之處下帖為弊已  
久須是釐革禮部起請每帖前後各出一行相類之  
處並不須帖是載禮部侍郎楊浚始開為三行  
不得帖斷

絕疑似明經所試一大經及孝經論語爾雅帖各有  
之言也

差帖既通而口問之一經問十義得六者為通而後  
試策凡三條三試皆通者為第進士所試一大經及

爾雅舊制帖一小經并註開元二十五帖既通而後

試文試賦各一篇文通而後試策凡五條三試皆通

者為第經策全通為甲策道四帖通四帖以上為乙

策道三帖通三以下及策雖全通而帖經文

不通四或帖經雖通四以明法試律令各十帖試冊  
上而策不通四皆為不第

共十條律七條全通為甲通八以上為乙自七以下  
令三條

為不第書者試說文字林凡十帖說文六帖試無嘗  
字林四帖

限皆通者為第算者試九章海島孫子五曹張丘建



夏侯陽周髀五經綴術緝古帖各有差

九章九帖五經等七部各

一帖綴術六帖緝古四帖

兼試問大義皆通者為第凡眾科有能

兼學則加超獎不在嘗限案今科第秀才與明經同為四等進士與明法同為二等然秀才之科久廢而明經雖有甲乙丙丁四科進士有甲乙二科自武德以來明經惟有丙丁第進士惟乙科而已先試之期命舉人謁于先師有司卜日宿張於國學宰輔以下皆會而觀焉博集羣議講論而退禮部關試之日皆嚴設兵衛薦棘圍之搜索衣服譏訶出入以防假濫焉其進士大抵千人得第者一二明經倍之得第者

十一二其制誥舉人不有彙科皆標其目而搜揚之

試之日或在殿庭天子親臨觀之試已糊其名於中考之文冊高者特授以美官其次與出身開元以後四海晏清士無賢不肖恥不以文章達其應詔而舉者多則二千人少猶不減千人所收百纔有一

十二載七月詔天下舉人不得充鄉試皆須補國子學生及郡縣學生然聽舉四門俊士停

十三載十月御含元殿親試博通墳典洞曉玄經詞藻宏麗軍謀出眾等舉人命有司供食既暮而罷其詞藻宏麗問策外更試詩賦各一首制舉試詩賦自



此始也

是月道舉停習道德經加周易宜以來載爲始

十四載二月弘文館學生自今以後宜依國子監學生例帖試明經進士帖經並減半雜文及策皆須粗通仍永爲嘗式

肅宗至德元年已後依前鄉貢

乾元元年四月詔曰國子監學生明經法帖策口試各十並通四已上進士通三與及第鄉貢明經准嘗式式州縣學生放歸營農待賊平之後任依嘗式

代宗寶應二年六月禮部侍郎楊綰上疏曰國之選

士必資賢良蓋孝友純備言行敦實居嘗育德動不違仁體忠信之資履謙恭之操藏器則未嘗自伐虛心而所應必誠夫如是故能率已從政化人鎮俗者也自叔葉澆詐茲道沒微爭尚文詞互相矜衒馬卿浮薄竟不周於時用趙壹虛誕終取擯於鄉閭自時厥後其道彌盛不思實行皆徇空名敗俗傷風備載前史古人比文章於鄭衛蓋有繇也近煬帝始制進士之科當時猶試策而已至高宗朝劉思立爲考工員外郎又奏進士加雜文明經加帖從此積弊轉而成俗幼能就學皆誦當代之詩長而博文不越諸家



之集通相黨與用致虎聲六經則未嘗開卷三史則  
皆同挂壁况復徵以孔門之道責其君子之儒者哉  
祖習既浮奔競爲尚矜能者曾無愧色勇進者但欲  
凌人以毀黷爲嘗談以向背爲已任投刺干謁驅馳  
於要津露才揚已宜騰於當代古之賢良方正豈有  
如此者乎朝之公卿以此待士家之長老以此垂訓  
欲其迓敦朴懷禮讓守忠信識廉隅何可得也譬之  
於水其流已濁若不澄本何當復清方今聖德御天  
再寧寰宇四海之內顯顯向化皆延頸舉踵思聖朝  
之理也不以此時而理之則太平之制又乖矣凡國

之人柄莫先擇士自古哲后皆側席待賢今之取人  
令投牒自應殊非經國之體也欲望請依古制令縣  
令察孝廉審知在鄉閭有孝友信義廉恥之行加以  
經業才堪策試者以孝廉爲名薦之於州刺史當以  
禮待之試其所通之學其堪者送名於省自縣至省  
不得令舉人輒自陳牒比來有到狀保辨試牒等一  
切並停其所習經取左傳公羊穀梁禮記周禮儀禮  
尚書毛詩周易任通一經務取深達與旨旁通諸家  
之義試日差諸司官有儒學者對問每經問義十條  
問畢對策三道其策皆問古今理體及當時要務取



堪行用者其經義并策全通爲上第望付吏部便與  
官其經通八策通二爲中第與出身下第者罷歸其  
明經比試帖經殊非古義皆誦帖括與圖僥倖近有  
道舉亦非理國之體望請與明經進士並停其國子  
監人亦請准此如有行業不著所繇妄相推薦請量  
加貶黜所異數年之間人倫一變旣歸實學當識大  
猷居家者必修德業從政者皆修廉恥浮說自止敦  
龐自勸教人之本實在茲焉事若施行卽別立條制  
詔委左右丞相諸司侍郎御史大夫中丞給舍同議  
奏聞給事中李栖筠尚書左丞賈至京兆尹兼御史

大夫嚴武各奏議狀與綰同賈至議曰謹案夏之政  
尚忠殷之政尚敬周之政尚文文與忠敬皆統人之  
行也且謚號述行美於文文與則忠敬存焉是故前  
代以文取士本行文也繇詞以觀行則及詞也宣父  
稱顏子不遷怒不貳過謂之好學至乎修春秋則游  
夏之徒不能措一詞不亦明乎間者禮部取人有理  
斯義易曰觀乎人文以化成天下關雎之義曰先王  
以是經夫婦成孝敬厚人倫美教化移風俗蓋王政  
之所繇廢興也故延陵聽詩知諸侯之存亡今試學  
者以帖字爲精通不窮旨義豈能知遷怒二過之道



乎考文者以聲病爲是非惟擇浮艷豈能知移風易俗化天下之事乎是以上失其源而下襲其流波蕩不知所止先王之道莫能行也夫先王之道消則小入之道長小人之道長則亂臣賊子繇是生焉臣弑其君子弑其父非一朝一夕之故其所繇來者漸矣漸者何謂忠信之凌頹恥尚之失所未學之馳騁儒道之不舉四者皆繇取士之失也夫一國之士繫一人之本謂之風贊揚其風卿大夫也卿大夫何嘗不出于士乎今取士試之小道而不以遠者大者使于祿之徒趨馳末術是誘道之差也夫以螭蚓之餌雜

垂滄海而望吞舟之至不亦難乎所以食垂餌者皆小魚就科試者皆小藝四人之業士最關於風化近代趨士靡然向風致使祿山一呼而四海震蕩思明再亂而十年不復向使禮讓之道弘仁義之風著則忠臣孝子比屋可封逆節不得而萌也人心不得而搖也且夏有天下四百載禹之道喪而殷始興焉殷有天下六百祀湯之法棄而周始興焉周有天下八百年文武之政廢而秦始并焉觀三代之選士任賢皆取實行故能風俗淳一運祚長遠秦坑儒士二代而亡漢興雜三代之政弘四科之舉西京始振經術



之學東都終持名節之行至有外戚竊位強臣擅權  
弱主外立母后專政而社稷不隕終彼四百豈非學  
行扇化於鄉里哉厥後文章道弊尚於浮侈取士術  
異苟濟一時自魏至隋四百餘載三光分景九州阻  
域竊號僭位德義不脩是以子孫速顛享國咸促今  
國家華魏晉梁隋之弊承夏商周漢之業四隩既宅  
九州攸同覆燾亭育合德天地安有捨皇王舉士之  
道從亂代取人之術此公卿大夫之恥也楊綰所奏  
實爲正論然自典午覆敗中原版蕩戎狄亂華衣冠  
遷徙南北分裂人多僞處聖朝一平區宇尚復因循

版圖則張閭并未設士居鄉土百無一二因緣官族  
所在耕桑地望繫數百年之外而身皆東西南北之  
人焉今欲依制鄉舉里選猶恐取士之未盡也請兼  
廣學校以弘訓誘今兩京有大學州縣有小學兵革  
一動生徒流離儒臣師氏祿廩無向貢士不稱行實  
胄子何嘗講習獨禮部每歲擢甲乙之第謂弘獎擢  
不亦謬歟祇足長浮薄之風啓僥倖之門矣其國子  
博士等望加員數厚其祿秩選通儒碩生間居其職  
十道大郡置大學館令博士出外兼領郡官召置生  
徒依乎故事保桑梓者鄉里舉焉在流寓者庠序推



焉朝而行之夕見其利如此則青青不復興刺擾擾  
繇其歸本矣人倫之始王化之先不過是也李廙等  
議與至協文多不載宰臣等奏以舉人舊業已成難  
於速改其今歲舉人望且許應舊舉來歲卽依新格  
廣德元年七月禮部侍郎楊綰上貢舉條曰孝廉  
舉人請取精通一經每經問義二十條皆須旁通諸  
義深識微言試策三道每日問一道問古今理體取  
堪行用者經義及策全通爲上第望付吏部便與官  
義通七策通二爲中第與出身下第者罷之論語孝  
經聖人深旨孟子儒門之達者望兼習此三者爲一

經其試如上先取在家有孝義廉恥謙恭之行好學  
不倦精通經義并堪對策者縣令徵於鄉里送名於  
州刺史與曹官對試以其通者送省旣是貢士刺史  
縣令不得以部人待之加其禮數隨朝集使以十月  
二十五日到省其鄉飲酒及至上都朝見并謁先師  
并依舊式又以寇難之故衣冠多去故鄉所居必聞  
才行斯在望許所在州縣且舉所諳知者秀才舉人  
准舊格惟試方畧策五條望令精通五經每經准孝  
廉例問義二十條對策五條每日試一道全通爲上  
第送中書門下超與處分十條通七策通四爲中第



送吏部與官下者罷之又國子監舉人亦請每歲本  
業博士推擇才行送名與祭酒依鄉貢例試通者送  
省舉人自縣至州皆不得輒自陳牒比來有到狀保  
辨停牒等請並停明法舉人望付刑部考試疏入帝  
問翰林學士或以進士明經行來頗久不可頓令改  
業遂勅與舊法兼行  
是月勅弘文崇文兩館生皆以資蔭補充所習經業  
務須精熟楷書字體皆得正樣通七者與出身不通  
者罷之

二年五月罷歲貢孝悌力田及童子科從禮部侍郎  
楊綰奏也綰以孝悌之行宜有實狀童子越眾不在  
常科同之歲貢恐成僥倖之路

永泰元年始置兩都貢舉禮部侍郎官號皆以知兩  
都爲名每歲兩地別放及第

大曆三年四月復置童子科舉每歲本貫申送禮部  
同明經考試取十歲以下習一經兼論語孝經每卷  
誦文十科全通者與官通七已上者與出身仍每年  
冬本貫申送禮部同明經舉人例考試訖聞奏

十年五月詔今年諸色舉人並赴上都集  
先是禮部侍郎賈至  
以時艱歲歉舉人赴省者衆權奏兩都分理時禮部  
侍郎嘗衰以貢舉人合謁見異於選人並合上都集



舉舊章也是後  
不置東都貢舉

是月勅停童子科舉

德宗建中二年二月中書門下奏准制崇玄館學生  
試日減策一道者其崇玄館附學官見任者既同行  
事例合霑恩惟策一道不可更減大義兩條從之  
六月勅孝廉科宜停

二年十月中書舍人趙贊權知貢舉先時進士試詩  
賦各一篇時務策五道明經策三道贊奏以箴論表  
贊代詩賦仍各試策三道應口問大義明經人明經  
之日義以為先比來相承惟務習帖至於義理少有

能通經術寢衰莫不繇此今若頓取大義恐全少其  
人欲且因循又無以勸學請約舉司舊例稍示考義  
之難承前問義不形文字落第之後喧競者多臣今  
請以所問錄於紙上各令直書其義不假文言既與  
策有殊又事堪微證憑此取舍庶歸至公如有義策  
全通者五經舉人請准廣德元年七月勅超與處分  
明經請減兩選伏請每歲甄獎不過數人庶使經術  
漸興人知教本勅旨明經義策全通者令所司具名  
聞奏續商量處分餘依

三年四月勅禮部應進士舉人等自今以後如有試



官并不合選并諸色出身人有應舉者先於舉司陳  
狀准例考試如才堪及第者送名中書門下重加考  
覈如實才堪卽令所司進納告身注毀官申准例與  
及第至選口仍稍優與處分其正員官不在舉限  
貞元二年六月詔自今已後舉選人有能習開元禮  
者舉人同一經例選人不限選數許集但問大義一  
百條試策三道全通者超資與官義通七十條策通  
二道已上者放及第已下不在放限其有試官能通  
者亦依正員官例處分其明經舉人有能習律一部  
以代爾雅者如帖義俱通於本色減兩選令卽日與

官其明法舉人有能兼習一經小帖義通者依明經  
例處分

五年四月詔曰明經舉人所習爾雅多是草木鳥獸  
之名無益理道宜令習老子道德經以代爾雅其進  
士同大經例帖

六年九月勅本置兩館學士皆選勳賢胄子蓋欲令  
其講藝紹習家風固非開此倖門墮紊典教且令式  
之內具有條章考試之時理須精覈比聞此色倖冒  
頗深或假市門資或變易昭穆殊虧教化之本但長  
澆漓之風未補者務取闕員已補者自然登第用廢



既已乖實試藝又皆假人誘進之方豈當如此自今  
已後所司宜據式文考試定其升黜如有假代益准  
法處分

九年五月詔曰王者設教勸學攸先生徒肄業執禮  
爲本故孔子曰不學禮無以立又曰安上理人莫善  
於禮然則禮者蓋務學之本立身之端居安之大猷  
致治之要道屬詞比事而不裁之以禮則亂疏通知  
遠而不節之以禮則誣實百行之本源爲五經之戶  
牖雖聖人設教罔不會通而學者遵行宜有先後自  
項有司定議計功記習不量教化淺深義理難易遂

使脩傳學者例從冬集習禮經者獨授散官敦本勤  
人頗乖指要始務弘獎以廣儒風自今已後明經習  
禮記及第者亦宜冬集如中經兼習周易若儀禮者  
量減一選應諸色人中習三禮者前資及出身人依  
科目例白身人依貢舉例每經問大義三十條試策  
三道仍主司於朝官學官中簡選精通經術三五人  
聞奏主司與同試問質定通否義策全通爲上等轉  
加超獎大義每經通十五條已上策通兩道已上爲  
次等依資與官如先是員外試官者聽依正員例其  
習開元禮人問大義一百條試策三道全通者爲上



等大義通八十條已上策兩道已上為次等餘一切  
並准習三禮例處分其諸館學士願習三禮及開元  
禮者並聽仍永為嘗式  
十年中書侍郎平章事齊抗奏罷禮部別頭舉人故  
事禮部侍郎掌貢舉其親故卽試于考功謂之別頭  
舉人抗奏罷之

十二年三月國子司業裴肅奏爾雅為六經文字之  
楷模老子是聖人玄微之奧旨請勒天下明經進士  
五經及明一經進士五經及諸科舉人依前習道德  
經者宜准天寶元年勅處分應合習爾雅者並准舊

式初天寶元年尊崇道教以老子乃玄元皇帝微言  
與旨不可列為小經今有司以爾雅代老子至貞  
元五年四月宰臣又議云所習爾雅多是草木鳥獸  
之名無益理道又令舉人停爾雅改習道德經至是  
又改焉

十三年十二月顧少連為尚書左丞權知貢舉奏伏  
以取士之科以明經為首教人之本則義理為先至  
於帖書及以對策皆形文字并易考尋試義之時獨  
令口問對答之失覆視無憑黜退之中流議遂起伏  
請准建中二年十二月勅以所問錄於紙上各令直  
書其義不假文言仍請依經疏對奏勅宜依

十四年九月詔鄉貢武舉并應百隻箭及三十隻箭



人等今年宜權停時諫議大夫田敦因蒙召對奏言  
兵部武舉等每年嘗數百千人持挾弓矢出入皇城  
間恐非所宜上聞而矍然故命停之其實武舉者每  
歲不過十數人時議惡敦貴欲非短舊事奏議不實  
自是訖于貞元更不復置

十六年十二月勅禮部別頭舉人宜委禮部考試不  
須置別頭

十八年五月勅明經進士自今以後每年考試所收  
人明經不得過一百人進士不得過二十人如無其  
人不必要滿此數

十九年六月勅禮部舉人自春以來久愆時雨念其  
旅食京邑資用屢空其禮部舉人今年宜權停

憲宗元和二年十二月壬申禮部貢舉院奏五經舉  
人請罷試口義依前試墨義十條五經通五明經通  
六便放入第從之勅自今以後州府所送進士如迹  
涉疎狂兼虧禮教或曾爲官司科罰或曾任州府小  
吏一事不合入清流者雖薄有詞藝并不得申送入  
如舉送以後事發長吏停見任及已停替者殿二年  
本試官及司功官并貶降

三年五月兵部奏鄉貢武舉准貞元十四年九月詔



宜權停今請准舊例却置從之

七年十二月權知禮部侍郎韋貫之奏試明經請停

墨義依舊格問口義從之

十三年十月權知禮部侍郎庾承宣奏臣有親屬應

明經進士舉者請准舊例送考功試之先是貞元十

六年高郢掌貢請停考功別試識者是之至是始復

穆宗長慶元年三月勅今年禮部侍郎錢徽下進士

及第鄭朗等一十四人重試聞奏四月詔曰國家設

文學之科本求實才苟容僥倖則異至公訪聞近日

浮薄之徒扇為朋黨謂之關節于擾主司每歲策名

無不先定永言敗俗深用興懷鄭朗等昨令重試意

在精覈藝能不於異書之中固求深僻題目貴令所

試成就以觀學藝淺深孤竹管是祭天之樂出於周

禮正經閱其呈試之文都似不知本事詞律鄙淺蕪

累至多亦令宣示錢徽庶其深自懷愧誠宜盡棄以

警將來但以四海無虞人心方泰用引寧僭式示殊

恩特掩爾瑕庶明予志孔溫業趙存約竇狗直所試

粗通與及第盧公亮等十人並落下錢徽從別勅處

分自今以後禮部舉人宜准開元二十五年勅及第

訖所試雜文并策送中書門下詳覆



二年二月諫議大夫殷侑奏謹案春秋二百四十二年行事王道之正人倫之紀備矣故先師仲尼稱志在春秋歷代立學莫不崇尚其教伏以左傳卷軸文字比禮記多較一倍公羊穀梁比尚書周易多較五倍是以國朝舊制明經若大經中經能習一傳即放冬集然明經爲學者猶十不一二今明經一例冬集人之掌情趨少就易三傳無復學者伏恐周公之微旨仲尼之新意史官之舊章將墜於地伏請置二傳科以勸學者左傳問大義五十條公羊穀梁各問大義三十條策三道義通七以上策通二以上與及第

其白身應者請同五經例處分其先有出身及前資官應者請唯學究一經例別處分又秦歷代史書皆記當時善惡繫以褒貶垂裕勸戒其司馬遷史記班固范曄兩漢書旨義詳明懲惡勸善亞於六經堪爲代教伏惟國朝故事國子學有文史直者弘文館弘文生並試以史記兩漢書三國志又有一史科近日已來史學都廢至於有身處班列朝廷舊章昧而莫知者况乎前代之載焉能知之伏請量前件史科每史問大義一百條策三道義通七策通二以上爲及第能通一史者白身請同五經三傳例處分其有出



身及前資官應者請同學究一經別處分其有出身  
及前資官稍優與處分其三史皆通者請錄奏聞特  
加獎擢仍請班下兩都國子監任生徒習請勅旨宜  
依仍付所司

三年禮部侍郎王起掌貢舉先是貢舉俛濫勢門子  
弟交相酬酢寒門俊造十棄六七及元稹李紳在翰  
林浮怒其事故有覆試之科及起考貢士奏曰伏以  
禮部放榜已是成名中書重覆尚未及第若重覆之  
中萬不一定則放榜之後遠近誤傳其於事理實爲  
非便請今年進士堪及第者本司考試訖其詩賦先  
送中書門下詳覆候勅却下本司然後准例大字放  
榜從之

冊府元龜

貢舉部



